

परमेश्वरसे यूहन्नादा उन्बा ताम चु किताबला बारेरी पाङ्तोःमा

श्रिबा म्हिः येशूला मुल चेला यूहन्नासे श्रिबा मुबा। चु यूहन्नासे छार कबुलरी मुबा किताबगदे न्हडला “थार्बा पिन्बा समाचार” देन गोर सोम चिठीगदेएनोन श्रिबा मुबा।

श्रिबा ग्लाः समुन्द्रला गुडरी मुबा पत्मोस श्रिबा ग्लारी श्रिबा मुबा।

श्रिबा सालः ओस्पन ईश्वी संवत् ९०-९५ (विक्रम संवत् १४७-१५२) सालला गुडरी श्रिबा मुबा।

खाल्दा श्रिबाः एशिया अञ्चलरी मुबा गोर निस मण्डलीगदेदा श्रिबा मुबा।

चु किताबरी मुबा जम्मान तामगदे परमेश्वरसे यूहन्नादा उन्बा ताम हिन्ना। चु ताम म्हाङ्बा धुइरी यूहन्नादा म्हाङ् हङ्बान छोर्बा मुबा। यूहन्नादा उन्बा ताम चा दुखला धिनगदेला बारेरी हिन्ना। चु “दुखला धिनगदे” यूहन्नाला धुइरीन शुरु तसी जिन्बा मुबा। तिग्दा भिसम थेनीगदेसे येशू ख्रीष्टदा हाडला प्रभु हिन्ना भिसी विश्वास लबा मुबा। यूहन्नासे खास लसी चु चिठी पढब लबागदेदा आशदेन आँट पिन्बाला लागिरी ओच्छे दुखदेन आपत विपतला धुइरी हाडसे लबा विश्वासरी याडयोड आतना चिबाला लागिरी बिन्ती लबा मुला।

चु किताबला ल्हाना हङ्बा खण्डगदेरी उन्बा तामदेन म्हाङ्बा तामगदेदा चिनुगदेग्याम घोना लबा मुला। चुहङ्बा चिनुगदे थे धुइला विश्वासीगदेसे घोबारी खम्मुबा, तर स्यहान्दो म्हिगदेदा चा घोबारी गाहो तमुबा। हिन्बाम ल्हानान म्हिगदेसे चु किताबला बारेरी थरी थरीला तामगदे पाङ्मुला। तर मुल ताम चा प्रस्टन मुला।

थे मुल ताम चुनोन हिनना, प्रभु ख्रीष्टग्याम परमेश्वरसे शैतानदेन हाडला जम्मान शत्रुगदेदा सदनना लागिरी नाश लला। ओच्छे जुन धुइरी शैतानदेन हाडला जम्मान शत्रुगदेथोरी ढाला थे धुइरी परमेश्वरसे हाडदा विश्वास लबा म्हिगदेदा छार स्वर्गदेन छार जम्बुलिड इनाम पिन्ना।

मुल तामगदे

शुरुला तामदेन फ्याफुल्बा १:१-८

परमेश्वरसे यूहन्नादा उन्बा ताम १:९-२०

गोर निस मण्डलीगदेदा भ्रिबा चिठी २:१-३:२२

यूहन्नासे स्वर्ग म्राड्बा ४:१-११

गोर निस लाहा छाप लबा रिल्सी थान्बा किताबला मुठा ५:१-८:५

गोर निस बिगुलगदे ८:६-११:१९

अजिङ्गरदेन गोर न्ही जन्तु १२:१-१३:१८

यूहन्नादा उन्बा अर्गु तामगदे १४:१-१५:८

परमेश्वरला बोमोसे प्लिड्बा गोर निस खोरे १६:१-२१

परमेश्वरसे हाडला शत्रुगदेथोरी ढाबा १७:१-२०:१०

परमेश्वरसे लबा जम्मान भन्दा लिच्छाला निसाफ २०:११-१५

छार स्वर्ग, छार जम्बुलिडदेन छार यरूशलेम २१:१-२२:५

ख्रीष्ट दोःसी योनान फेपखला २२:६-२१

परमेश्वरसे यूहन्नादा उन्बा ताम

¹ चु किताबला जम्मान तामगदे येशू ख्रीष्टग्याम उन्बा हिनना। हाडला गे लबा म्हिगदेसे योनान ततोःबा जम्मान तामगदेला बारेरी घोखमगै भिसी परमेश्वरसे येशू ख्रीष्टदा चु जम्मान ताम पिन्जी। चु ताम पाड्बाला लागिरी येशू ख्रीष्टसे हाडला गे लबा यूहन्ना मुबा ग्लारी स्वर्गदूत गिक पुइखजी। ² हाडसे म्राड्बा जम्मान

ताम यूहन्नासे पाङ्बा मुला। थेसे पाङ्बा परमेश्वरला बचनदेन येशू ख्रीष्टसे उन्बा सत्य ताम चुनोन हिन्ना।³ चु किताब पढब लबादेन चु किताबरी मुबा परमेश्वरग्याम पाङ्बा बचन ड्यान्सी थे अन्छार भ्रबा जम्मान म्हि परमेश्वरग्याम मोलम याङ्बा म्हि हिन्ना। तिग्दा भिसम चु जम्मान ताम योनान तसेला मुला।

यूहन्नासे फ्याफुल्ला भिसी पाङ्बा

⁴ एशियारी मुबा गोर निस मण्डलीदा डा यूहन्नाग्याम फ्याफुल्ला। दान्देनोन मुला, डाच्छाएनोन मुबा, दोःसीनोन फेप्खबा परमेश्वरग्यामदेन थेला ठिला डाच्छापट्टि चिबा गोर निस आत्माग्याम एनीगदेदा दयामायादेन शान्ति तगै।^{*} ⁵ ओच्छे परमेश्वरला बारेरी जम्मान सत्य ताम उन्बा विश्वास लखम्बा येशू ख्रीष्टग्यामसेनोन एनीगदेदा दयामायादेन शान्ति तगै। थे सिबागदेग्याम जम्मान भन्दा डाच्छा सोबादेन जम्बुलिडरी शासन लबा ग्लेगदेलाएनोन ग्ले हिन्ना।^{*}

थेसे य्हाडदा माया लसी ह्हाडला कासे पापग्याम फेबा मुला।

⁶ थेसे ह्हाडला आबा परमेश्वरदा तेन्बाला लागिरी य्हाडदा परमेश्वरदा पूजा लबा महिला य्हुल गिक स्होजी। थेनोन येशू ख्रीष्टदा सदन सदनना लागिरी मानदेन जयजयकार तगै।
आमेन।^{*}

⁷ च्यागो, थे खसुरी फेप्खबान मुला,

थेदा भ्लोसी साइबागदेदेन जम्मान म्हिसे थेदा म्हाड्ला।

ओच्छे जम्बुलिडला जम्मान य्हुलला म्हिगदेसे थेला लागिरी सुर्दा लला।

हिन्ना चु तनोन तला। आमेन।^{*}

^{*} 1:4 प्रस्था ३:१४; उन्बा ४:५ ^{*} 1:5 यशै ५५:४; भजन ८९:२७ ^{*} 1:6 प्रस्था १९:६; उन्बा ५:१० ^{*} 1:7 दानि ७:१३; मत्ती २४:३०; मर्क १३:२६; लूका २१:२७; १ थेस ४:१७; जक १२:१०; यूह १९:३४, ३७

8 जम्मान भन्दा घेन परमप्रभु परमेश्वरसे चुहड् भिसी सुड्बा मुला, “अल्फादेन ओमेगा” डानोन हिनना,” थे दान्दे मुला, डाच्छाएनोन मुबा, दोःसीनोन फेप्खला।*

यूहन्नासे येशू ख्रीष्टदा म्राड्बा

9 डा एनीगदेला ज्योज्यो यूहन्नाएनोन एनीगदेदेन छ्यामनोन मुला। य्हाडसे य्हाडला ग्ले येशूदा विश्वास लबासे लमा दुख नाबा मुला, तसैनोन थेसे य्हाडदा चु दुख नाबारी आँट पिनबा मुला। चुलान लागिरी परमेश्वरसे य्हाडदा ड्योड्बा मुला। परमेश्वरला बचनदेन येशू ख्रीष्टला बारेरी थेःना लबासे लमा डादा समुन्द्रला गुडरी मुबा पत्मोस भिबा ग्लारी भोर्सी थान्बा मुबा। 10 प्रभुला धिनकुनुं डा परमेश्वरला आत्मासे प्लिड्बा मुबा। थेनोन धुडरी डाला ग्यापग्याम बिगुलला हड्बान घेन काडरी चुहड् भिसी पाड्बान लबा थेःजी, 11 “एसे जुन ताम म्राड्ला थे जम्मान ताम किताब गिकरी भ्रिउ। ओच्छे एफिसस, स्मुर्ना, पर्गामम, थिआटीरा, सार्डिस, फिलाडेल्फियादेन लाउडिकिया शहररी मुबा गोर निस मण्डलीदान पुड्गो।”

12 डाइ डादेन छ्याम ताम पाड्बा खाल चीम भिसी ग्याप दोःसी च्यामा थेरी गोर निस म्हरला नाडसल थान्बा स्हेदेन, 13 नाडसल थान्बा स्हेला गुडरी परमेश्वरसे पुड्खबा म्हि हड्बान काड्धोनान धोबा क्वान क्वान्बादेन कुरी म्हरला हड्बा फित्ता क्वान्बा म्हि गिकदा डाइ म्राड्जी।* 14 थेला थोबोदेन क्रा ऊनदेन ग्लिड हड्बान तार तार्बा मुबा। ओच्छे थेला मी मे ल्हाम हड्बान मुबा।* 15 थेला स्य्हाप चा मेरी ख्राड्सी स्होबा झक्झक्बा काँसला ताड

† 1:8 “अल्फादेन ओमेगा” भिबा चा ग्रीक ग्योडरी शुरुला हिगीदेन जम्मान भन्दा लिच्छाला हिगी भिबा हिनना। चु भिबा चा जम्मान भन्दा डाच्छादेन जम्मान भन्दा लिच्छा हिनना। * 1:8 उन्बा २१:६; २२:१३ † 1:10 “प्रभुला धिनकुनु” भिबा चा प्रभु येशू सिबाग्याम सोबा धिनकुनुदा पाड्बा हिनना। * 1:13 दानि ७:१३; १०:५

* 1:14 दानि ७:९; १०:६

हड्बान मुबा। ओच्छे थेला काइ चा स्योड ड्यबा हड्बान मुबा।*
 16 थेला दाहिने छ्यासे गोर निस सारगदे चुड्बा मुबा। ओच्छे थेला
 सुड्ग्याम न्हीलोनपट्टि धार मुबा छ्यारबा तरवार थोन्बा मुबा। थेला
 स्य्हाल चा धिनी गुडला धिनीला स्हेर हड्बान मुबा।

17 थेदा म्राड्मा डा सिबा तेबान तसी थेला स्य्हापरी हिल्जी।
 तर थेसे हाडला दाहिने छ्या डाथोरी थान्सी चुहड् भिसी सुड्जी,
 “थालोड्गो, जम्मान सहे शुरु लबादेन थुम्ना लबा डानोन हिनना।*
 18 सोबाएनोन डानोन हिनना। डा सिबा मुबा। च्यागो, डा सदनना
 लागिरी सोबा मुला। ओच्छे सिबा म्हिगदेला आत्मा चिबा
 ग्लादेन कालला साँचोगदे डादेन छ्यामनोन मुला। 19 थेतबासेलमा
 एसे जुन ताम म्राड्बा मुला थे भ्रिउ। ओच्छे दान्दे तबा तामगदेदेन
 लिच्छा तसेला तामगदे न्हीनोन भ्रिउ। 20 म्हिसे था आयाड्बा ताम
 एसे डाला दाहिने यारी म्राड्बा गोर निस सारगदेदेन म्हरला नाडसल
 थान्बा सहे निसला अर्थ चा चुनोन हिनना। गोर निस सारगदे चा
 मण्डली निसदा च्याबा म्हिगदे हिनना। ओच्छे म्हरला नाडसल
 थान्बा सहे निस चा मण्डली निस हिनना।”

2

एफिससला मण्डली

1 एफिससरी मुबा मण्डलीदा च्याबा म्हिदा चु ताम भ्रिउ।

चु ताम यारी गोर निस सार थोबादेन गोर निस म्हरला नाडसल
 थान्बा सहेला गुड्ग्याम भ्रबासे सुड्बा मुला। 2 एसे लबा जम्मान
 गेगदे डादा था मुला। ओच्छे एसे दुख लसी गे लबादेन सेम

* 1:15 इज १:२४; ४३:२ * 1:17 यशै ४४:६; ४८:१२; उन्बा २:८; २२:१३ † 1:18
 ग्रीक ग्योडरी सिबा म्हिगदेला आत्मा चिबा ग्लादा ‘हेडिस’ भिसी पाड्बा मुला। थे ग्लारी
 सिबा म्हिगदेला आत्मा परमेश्वरसे जम्मान भन्दा लिच्छा लबा निसाफला धुड भ्रान्सी
 चिमुला (उन्बा ६:८; २०:१३, १४)। † 1:20 ल्हानान हड्बा बाडबलरी चा “मण्डलीदा
 च्याबा म्हिगदे” भिबादा स्वर्गदूत भिसी भ्रिबा मुला (उन्बा २:१, ८, १२, १८; ३:१, ७,
 १४)।

नासी चिमुला भिबा ताम डादा था मुला। आज्यबा गे लबा म्हिगदेदा नाबारी आखम्मुला भिबा तामएनोन डादा था मुला। मुल चेला आहिनसै मुल चेला हिन्ना भिसी भ्रबागदेदा च्यासी थेनीगदेदा फट्टा म्हि हिन्ना भिसी एसे था याड्बा मुला भिबा तामएनोन डादा था मुला।³ ए थेन्नोन आतना डाला लागिरी दुख नासी भ्रान्सी चिबा मुला।⁴ तर एला बिरोधरी डाइ पाड्तोःबा ताम गिक मुला। थे ताम चा एसे डादा डाच्छा लबा माया ख्लाबा मुला।⁵ थेतबासेलमा ए खानडग्याम मार ताइजी, थे ताम ढन्गो। ओच्छे एसे लबा पाप ख्लासी परमेश्वरपट्टि दोःसी डाच्छा लबा गे लउ। चुदे ए पाप ख्लासी परमेश्वरपट्टि आदोःनी भिसम डा ए मुबा ग्लारी खसी एला नाडसल थान्बा सहे थेग्याम तेःला।⁶ तर एदेन छ्याम ज्यबा तामएनोन मुला, एसे डाइ हड् लसीन निकोलाइटसगदेलां गेदा बिरोध लबा मुला।⁷ जुन म्हिदा ड्यानबा सेम मुला, थेसे परमेश्वरला आत्मासे मण्डलीगदेदा सुड्बा ताम ड्यानसी ज्यना लसी घोड। जुन म्हिसे ढाला थेदा परमेश्वरला बगैचारीं मुबा जुनी पिन्बा दोडला रो चबारी पिन्ना।*

समुर्नाला मण्डली

⁸ ओच्छे समुर्नारी मुबा मण्डलीदा च्याबा म्हिदा चु ताम भ्रिउ।

चु ताम जम्मान सहे शुरु लबादेन जम्मान सहे थुम्ना लबासे सुड्बा मुला, थे सिबा मुबा दोःसी सिबाग्याम सोबा मुला।*

⁹ एसे गाते दुख नाबा मुला भिबा तामदेन ए गाते प्राड्बो मुला भिबा ताम डादा था मुला। तर पाड्न्नोन तोःमा ए फ्युक्पोन मुला। यहूदी आहिनसै यहूदी हिन्ना भिसी भ्रबा म्हिगदेसे एदा

† 2:6 निकोलाइटसगदे भिबा चा लुसीला ताम लोप्बा म्हिगदेला समूह हिन्ना। † 2:7

“परमेश्वरला बगैचा” भिबा चा स्वर्गएनोन तखम्ला। * 2:7 उत्प २:९; उन्बा २२:२;

इज २८:१३; ३१:८ * 2:8 यशै ४४:६; ४८:१२; उन्बा १:१७; २२:१३

गाते बिरोध लमुला भिबा तामएनोन डादा था मुला। थेनीगदे मी शैतानना म्हिगदे हिन्ना। 10 एनीगदेशोरी खबारी छ्याइबा दुख म्हाङ्गी थालोङ्गो। च्यागो, एला विश्वास च्याबाला लागिरी शैतानसे एनीगदे न्हडला कोइ कोइदा झ्यालखानरी झाङ्गला। तर एसे च्युइरे जे दुख नातोःला। ए सिनोन तोःसे डादा विश्वास लबा थाख्लागो। ओच्छे डाइ एदा जुकजुकधोनाला जुनी याङ्गबा इनामा पिन्ना। 11 जुन म्हिदा ड्यानबा सेम मुला, थेसे परमेश्वरला आत्मासे मण्डलीगदेदा सुङ्गबा ताम ड्यानसी ज्यना लसी घोउ। जुन म्हिसे ढाला थेदा आत्मादा सिना लबा कालसे तिगै लबारी आखम।*

पर्गाममला मण्डली

12 पर्गामम भिबा ग्लारी मुबा मण्डलीदा च्याबा म्हिदा चु ताम भिउ।

चु ताम न्हीलोनपट्टि छ्यारबा धार मुबा तरवार थोबासे सुङ्गबा मुला। 13 ए शैतानना ठि मुबा ग्लारी चिमुला भिबा ताम डादा था मुला। तसैनोन एसे डादा विश्वास लसीन चिबा मुला, ओच्छे विश्वासरी कोङ्गबा तसी चिबा डाइ विश्वास लखम्बा एन्टिपासदा शैतानसे शासन लबा ग्लारी एनीगदेलान डाच्छा साइबा मुबा। थे धुइरीनोन एसे विश्वास लबा आख्लानी भिबा तामएनोन डादा था मुला।

14 तर एला बिरोधरी डाइ पाङ्गतोःबा तिगै ताम मुला। तिग्दा भिसम एदेन छ्याम कोइ कोइ बालामसे लोप्बा ताम अन्छार भ्रबा म्हिगदेएनोन मुला। थेसे इस्राएलीगदेदा पापरी फसब लबाला लागिरी मूर्तिदा फुल्बा सहेगदे चबारीदेन स्यूहान्दोदेन छ्याम ब्रेल्सी भ्रबारी तला भिसी बालाक ग्लेदा लोप्मुबा।*

† 2:10 थे धुइरी खेलरी ढाबा म्हिदा इनाम चा म्हेन्दोला मुकुट पिन्मुबा। * 2:11

उन्बा २०:१४; २१:८ * 2:14 गन्ती २२:५-७; ३१:१६; वयव २३:४; गन्ती २५:१-३

15 थेहड् लसीन निकोलाइटसगदेसे लोप्बा ताम अन्छार भ्रबा म्हिगदेएनोन एदेन छ्याम मुला। 16 थेतबासेलमा हाडला पाप ख्लासी परमेश्वरपट्टि दोःगो। आहिन्सम डा ए मुबा ग्लारी योनान खला ओच्छे डाला सुडरी मुबा तरवारसे थेनीगदेदेन छ्याम लडाइ लला।

17 जुन म्हिदा ड्यानबा सेम मुला, थेसे परमेश्वरला आत्मासे मण्डलीगदेदा सुडबा ताम ज्यना लसी ड्यानतोःला। जुन म्हिसे ढाला, डाइ थेदा छुम्सी थान्बा मनन् पिन्ना। ओच्छे डाइ थेदा छार मिन भ्रिबा तार युडबा गिक पिन्ना, थे युडबा याड्बा म्हिसे बाहेक स्य्हान्दो खालैसेन आघो।*

थिआटीराला मण्डली

18 थिआटीरारी मुबा मण्डलीदा च्याबा म्हिदा चु ताम भ्रिउ।

चु ताम मेला ल्हाम हड्बा मी मुबा ओच्छे झकझकबा काँस हड्बान स्यहाप मुबा परमेश्वरला झासे सुडबा मुला। 19 एसे तिग तिग लमुला थे डादा था मुला। एसे लबा माया, एसे लबा विश्वास, एसे लबा गेदेन नाबा जम्मान ताम डादा था मुला। ओच्छे एसे डाच्छा भन्दा दान्दे ल्हानान गे लमुला भिबाएनोन डादा था मुला।

20 तर एला बिरोधरी डाइ पाड्तोःबा तामएनोन मुला। एसे हाडसे हाडदान अगमवक्तास्या हिन्ना भिसी भ्रबा इजेबेल भिबा भ्रिडम्हेमेदा थेसे म्हन्बा अन्छार लपुड्जी। थेसे डाला गे लबा म्हिगदेदा स्य्हान्दोदेन छ्याम ब्रेल्सी भ्रबारीदेन मूर्तिदा फुल्बा सहेगदे चबारी तला भिसी लोप्मुला। चुहड् लसी थेसे थेनीगदेदा फसब लबा मुला।* 21 डाइ थेदा हाडला पाप ख्लासी परमेश्वरपट्टि दोःबारी मौका पिन्जी। तर थे स्य्हान्दोदेन छ्याम

* 2:17 प्रसथा १६:१४-१५; १६:३३-३४; यूह ६:४८-५०; यशै ६२:२; ६५:१५ * 2:20
१ राजा १६:३१; २ राजा ९:२२, ३०

ब्रेल्सी भ्रबारी ख्लासी परमेश्वरपट्टि दोःबारी आङ्ग्यान्नी।
 22 च्यागो, डाइ थेदा स्हु सहेर पिन्सी थान्ना। ओच्छे थे
 म्निडम्हेमेदेन छ्याम ब्रेल्सी भ्रबागदेसे हाडसे लबा आज्यबा गे
 ख्लासी परमेश्वरपट्टि आदोःनी भिसम डाइ थेनीगदेदा ल्हानान
 दुखरी थान्ना। 23 डाइ थेला ताम ड्यान्सी भ्रबागदे जम्मादान
 नाश लला। ओच्छे जम्मान मण्डलीगदेसे जम्मालान सेमला
 तामदेन म्हन्बा ताम म्राड्बादेन था याड्बा डा थेनोन हिनना
 भिसी था याड्ला। डाइ एनीगदे जम्मादान हाड हाडला गे
 अन्छारला इनाम पिन्ना।

24 तर थिआटीराला मण्डलीरी मुबा थे ताम अन्छार
 आभ्रबादेन शैतानना सेमरी मुबा ताम अन्छार आभ्रबा
 स्य्हान्दोगदेदा चा डाइ पाड्ला। डाइ एनीगदेथोरी तिगै दुख
 तना आल। 25 तर एनीगदेदेन छ्याम जुन विश्वास मुला, डा
 आखतेधोना थे विश्वासरी जे कोड्सी चिउ। 26 जुन म्हिसे ढाला
 ओच्छे आसितेधोना डाइ म्हन्बा अन्छार गे लला, थेदा डाइ
 यहूल यहूलथोरी शासन लबा अधिकार पिन्ना।*

27 जमाहेन्से थेसे फाइला कडी थोसी थेनीगदेथोरी शासन लला।
 ओच्छे साप्राला ताड थिबा हड् लसी थेनीगदेला शक्ति
 नाश तला।

28 डाइएनोन डाला आबाग्याम चु अधिकार याड्बा मुला।
 थेनीगदेसे ढाजी भिसी उन्बाला लागिरी डाइ थेनीगदेदा स्य्होला
 सुक्र पिन्ना। 29 जुन म्हिदा ड्यान्बा सेम मुला थेसे परमेश्वरला
 आत्मासे मण्डलीदा तिग सुड्बा मुला, थे ताम ड्यान्सी ज्यना
 लसी घोतोःला।

3

सार्डिसला मण्डली

* 2:26 भजन २:८-९

1 सार्डिसरी मुबा मण्डलीदा च्याबा म्हिदा चु ताम भिउ।

चु ताम परमेश्वरदा तेन्बा गोर निस आत्मादा तहरी थान्बादेन गोर निस सार थोबासे सुड्बा मुला। एला जम्मान गेगदे डादा था मुला, ए सोबा मुला भिसी मी पाड्मुला, तर ए सिबा मुला।² थेतबासेलमा छोर्सी चिउ, तिग्दा भिसम एदेन छ्याम मुबा विश्वास सिबारी छ्याइबा मुला। थेतबासेलमा नाश तबा भन्दा डाच्छान जोगब लसी कोड्ना लसी थान्गो। तिग्दा भिसम एसे लबा गे डाइ परमेश्वरदा सेम निबा खाल्ला आस्यापनी।³ एसे जुन ताम थे:बा मुला ओच्छे लोप्बा मुला, थे ताम ढन्गो। ओच्छे थे ताम अन्छार भ्रसी हाडला पाप ख्लासी परमेश्वरपट्टि दो:गो। डा ए मुबा ग्लारी यहो खबा हड् लसी खालैसे था आयाड्ना लसी खला। तर होशियार तसी आचिनी भिसम एसे डा खबा थानोन आयाड्।*

4 तर सार्डिसरीनोन कोइ कोइ म्हिगदेसे चा हाडला क्वान फोहोर† तना लबा आरे। थेनीगदे डादेन छ्यामनोन तार क्वान क्वान्सी भ्रला। तिग्दा भिसम थेनीगदे डादेन छ्याम भ्रबाधोनाला मुला।⁵ जुन म्हिसे ढाला थेदा चुहड् लसी तार क्वान क्वान्सी पिन्ना। डाइ थेला मिन जुकजुकधोनाला जुनीला किताबग्याम खाइमै मेटब आल। डाइ थेदा डाला आबादेन आबाला दूतगदेला डाच्छा चु डालान हिन्ना भिसी पाड्ला।*⁶ जुन म्हिदा ड्यान्बा सेम मुला, थेसे परमेश्वरला आत्मासे मण्डलीगदेदा तिग सुड्बा मुला, थे ताम ड्यान्सी ज्यना लसी घेतो:ला।

फिलाडेल्फियाला मण्डली

* 3:3 मत्ती २४:४३-४४; लूका १२:३९-४०; उन्बा १६:१५ † 3:4 फोहोर क्वान भिबा चा पापी बानीबेहोर हिन्ना। ओच्छे तार क्वान भिबा चा परमेश्वरदा सेम निबा बानीबेहोर हिन्ना। * 3:5 प्रस्था ३२:३२-३३; भजन ६९:२८; उन्बा २०:१२; मत्ती १०:३२; लूका १२:८

7 फिलाडेल्फियारी मुबा मण्डलीदा च्याबा म्हिदा चु ताम भ्रिउ।
 चु ताम तिगै दोष आरेबादेन सत्यसे सुड्बा मुला। थेदेन छ्याम
 दाऊद ग्लेला साँचो मुला, थेसे ठोड्बा सहे खालैसे दुड्बारी
 आखम। ओच्छे थेसे दुड्बा सहे खालैसे ठोड्बारी आखम।*
 8 एसे लबा जम्मान गेगदे डादा था मुला। च्यागो, डाइ एला
 लागिरी खालैसेन दुड्बारी आखम्बा माप ठोड्सी थान्बा मुला।
 एदेन छ्याम ल्हानान भड आरे भिबा ताम डादा था मुला। तसैनोन
 एसे डादा विश्वास लबा ख्लाबा आरे, ए डाला बचन अन्छार
 भ्रबा मुला। 9 च्यागो, शैतानना म्हिगदेसे हाड यहूदी आहिनसै
 यहूदी हिन्ना भिसी लुसीला ताम पाड्बागदेदा डा खसी एला
 काडरी फ्या लपुड्ला। ओच्छे डाइ एदा माया लमुला भिबा
 ताम थेनीगदेदा घोना लला।* 10 एसे ल्हानान दुख नासी डाइ
 कुल्बा ताम ड्यान्बासे लमा जम्बुलिडला जम्मान म्हिगदेला
 विश्वास च्याबा धुडरी तबारी छ्याइबा घेन दुखग्याम डाइ एदा
 जोगब लला।

11 डा योनान खबान मुला। एसे ढाबा मुकुट खालैसेन ब्यन्सी
 थाभोगै भिसी एदेन छ्याम मुबा ताम जोगब लसी थान्गो।
 12 जुन म्हिसे ढाला, थेदा डाइ डाला परमेश्वरला मन्दिरला
 थाम सहोला, ओच्छे थे थेग्याम खाइमै आथोन। डाइ थेथोरी
 डाला परमेश्वरला मिन भ्रिला, जमाहेन्से थे डाला परमेश्वरला
 शहरला म्हि दोला। थे शहर डाला परमेश्वरग्याम स्वर्गहेन्से
 मार खबा छार यरूशलेम हिन्ना। ओच्छे थेथोरी डाइ डाला
 छार मिनएनोन भ्रिला।* 13 जुन म्हिदा ड्यान्बा सेम मुला थेसे
 परमेश्वरला आत्मासे मण्डलीगदेदा सुड्बा ताम ड्यान्सी
 ज्यना लसी घोटो:ला।

* 3:7 यशै २२:२२; अय्यूब १२:१४
 उन्बा २१:२; यशै ६२:२; ६५:१५

* 3:9 यशै ४९:२३; ६०:१४; ४३:४

* 3:12

लाउडिकियाला मण्डली

14 लाउडिकियारी मुबा मण्डलीदा च्याबा म्हिदा चु ताम भ्रिउ।

चु ताम परमेश्वरसे सहोबा जम्मान सहेगदेथोरी शासन लबा, आमेल भिबादेन विश्वास लखम्बा ओच्छे सत्य ताम उन्बासे सुड्बा मुला।* 15 एसे लबा गेगदे डादा था मुला। ए न्ह लेप्बा मुला, न्ह सिम्बा मुला। बरु ए कि सिम्बा तगै कि लेप्बा तगै भिबा डाला सेम मुला। 16 ए न्ह लेप्बा मुला न्ह सिम्बा मुला, तर दालदोल जे मुबासे लमा डाइ एदा डाला सुड्ग्याम थो भ्याड्बा हड् लसी भ्याड्ला। 17 एसे हाडदा डा फ्युक्पो मुला, डादेन छ्याम जम्मान सहे मुला ओच्छे डादा तिगै सहेला खाँचो आरे भिसी पाड्मुला, तर ए गाते दया खबाधोनाला मुला भिबा तामदेन दुख याड्बा, प्राडबो, कानादेन लिगन्डी मुला भिबा ताम एदा था आरे। 18 थेतबासेलमा सदन फ्युक्पो दोबाला लागिरी डाग्याम मेरी खाड्सी खारेब लबा म्हर ग्लुउ। थेहड् लसीन एदा पेःबा खबा लिगन्डी ल्हुइ घपबाला लागिरी तार क्वान ओच्छे मी प्राड्बाला लागिरी मन डाग्याम ग्लुउ भिबा एदा डाला सल्लाह मुला।

19 जुन म्हिदा डाइ माया लला, थेदा डाइ बड्सी तहरी थान्ना। थेतबासेलमा झन्सी गे लबारी सेम लउ, ओच्छे हाडला पाप ख्लासी डापट्टि दोःगो।* 20 च्यागो, डा खालैला दिमरी खसी इयोइमा चुदे खालै म्हिसे डाला काइ थेःसी म्राप ठोड्जी भिसम डा दिम न्हडरी खला। ओच्छे थेदेन छ्याम चिसी चबा थुड्बा लला, थेसेनोन डादेन छ्यामनोन चिसी चबा थुड्बा लला।

21 डाइ ढाजी, ओच्छे डाला आबादेन छ्यामनोन आबाला ठिरी चिबा हड् लसी जुन म्हिसे ढाला डाइ थेदा डाला ठिरी डादेन छ्यामनोन चिपुड्ला। 22 जुन म्हिदा ड्यान्बा सेम मुला,

* 3:14 हितो ८:२२ * 3:19 हितो ३:१२; हिब्रू १२:६

थेसे परमेश्वरला आत्मासे मण्डलीगदेदा सुड्बा ताम ड्यानसी ज्यना लसी घोटो:ला।

4

यूहन्नासे स्वर्ग म्राड्बा

1 जमाहेन्से च्यागो, डाइ स्वर्गरी म्राप गिक ठोड्बा म्राड्जी। डाइ डाच्छा थे:बा बिगुलला हड्बान काइग्याम डादा चुहड् सुड्बान लबा डाइ थे:जी। “ए तोर खउ, दाहेन्से तसेला तामगदे डाइ एदा उन्ना।” 2 जमाहेन्से डा तिक्खुरीन परमेश्वरला आत्मासे प्लिड्जी। ओच्छे स्वर्गरी म्हि गिक धन्छ्याबान लबा ठि गिक म्राड्जी।* 3 थेला स्य्हाल चा झक्झक्बा मणि हड्बान जेबा मुबा ओच्छे ठिला क्यारक्युर चा झक्झक्बा रतन हड्बान लरक्युड मुबा। 4 थे ठिला क्यारक्युर बोगल गिकसे गोर ब्लि अर्गु ठिगदे मुबा। थेनोन ठिगदेरी बोगल गिकसे ब्लि गन्बागदे चिबा मुबा। थेनीगदेसे तार क्वान क्वान्बादेन थोबोरी म्हरला मुकुट कूबा मुबा। 5 थे ठिग्याम तिप्लीड हड् लसी मे थोनबादेन गडडगुडुड मु ठेड्बा हड्बा काइ खमुबा। ओच्छे थे ठिला डाच्छापट्टि गोर निस मेदड लुड्बा मुबा। थे मेदड चा परमेश्वरला आत्मा निस हिनना।* 6 थे ठिला डाच्छापट्टि प्रस्टन म्राड्बा ऐना हड्बान समुन्द्र मुबा।*

लिच्छापट्टिएनोन डाच्छापट्टिएनोन ल्हुइ नाडनोन मीनोन मी मुबा गोर ब्लि छोनबो जन्तु थे ठिला क्युर्नोन मुबा। 7 थे जन्तुगदे चा गिक च्यान हड्बा, गिक म्हे बहर हड्बा, ओच्छे गिकला ली चा म्हिला हड्बा मुबा, थेहड् लसीन गिक चा फ्याड्बान लबा ग्वाइ हड्बान मुबा। 8 थे गोर ब्लि छोनबो जन्तुगदेलाना गोर

* 4:2 इज १:२६-२८; १०:१ * 4:5 प्रस्था १९:१६; उन्बा १:४; ८:५; ११:१९; १६:१८; इज १:१३; जक ४:२ * 4:6 इज १:२२, ५-१०; १०:१४ † 4:8 चु जन्तु चा जम्बुलिडला जन्तु हड्बा आहिन। तर परमेश्वरसे यूहन्नादा तैगै ताम उन्बा धुडरी म्राड्बा ताम पाड्बा जन्तु हिनना।

हु हु भ्याप मुबा। ओच्छे थेनीगदेला भ्यापला पाखापट्टिऍनोन
 न्हडपट्टिऍनोन मी मुबा। थेनीगदे धिन म्हूननोन थेन आतना
 चुहड् भिसी व्हाइ गोमुबा,
 “जम्मान भन्दा घेन परमप्रभु परमेश्वर
 चोखो, चोखो, चोखो[†] मुला।
 थे दान्देनोन मुला, डाच्छाऍनोन मुबा ओच्छे दोःसीनोन
 फेपखला।”*

9 थे छोन्बो जन्तुगदेसे जुकजुकधोनान सोसी चिबा मुल
 ठिरी धन्छ्याबादा जयजयकारदेन धन्यवाद पिन्सी मान लमुबा।
 10 जमाहेन्से थे बोगल गिकसे गोर बलि गन्बागदेसे ठिरी
 धन्छ्याबा सदन सोसी चिबादा फ्या लजी। ओच्छे थेनीगदेसे हाड
 हाडला मुकुट ठिला डाच्छापट्टि थान्सी चुहड् भिसी व्हाइ गोजी,
 11 “जम्मान जयजयकार, मानदेन शक्ति याड्तोःबा डन्ना प्रभु
 परमेश्वर हाड जे हिन्ना।

तिग्दा भिसम जम्मान सहेगदे हाडसेन सहोबा हिन्ना।
 थे जम्मान सहे हाडसे म्हन्बा अन्छारनोन तजी, ओच्छे सहोजी।”

5

गोर निस लाहा छाप लसी रिल्सी थान्बा किताबला मुठा

1 ओच्छे डाइ ठिरी धन्छ्याबाला दाहिने छ्यारी रिल्सी थान्बा
 किताबला मुठा गिक म्राड्जी। थे किताबरी न्हीलोनपट्टि भिबा मुबा
 ओच्छे बन्द लसी ग्ला निसरी लाहा छाप लबा मुबा।* 2 ओच्छे
 डाइ शक्तिशाली स्वर्गदूत गिकदा म्राड्जी। थेसे “चु रिल्सी थान्बा
 किताबला मुठारी लबा लाहा छाप ब्लबादेन ठोड्खम्बाधोनाला
 म्हि खाल मुला?” भिसी घेन काइसे पाड्बान मुबा। 3 तर

† 4:8 चुरी ‘चोखो’ भिबा चा तिगै दोष आरेबादेन जम्मान भन्दा घेन ओच्छे थे भन्दा
 स्यहान्दो खालै आरे। थेतबासेलमा जम्मासेन थेदा तेन्तोःला। * 4:8 इज १:१८;
 १०:१२; यशै ६:२-३ * 5:1 इज २:९-१०; यशै २९:११

स्वर्गरी, जम्बुलिडरी ओच्छे जम्बुलिडला धिरी चु रिल्सी थान्बा किताब ब्लसी च्याबारी खम्बा म्हि खालै आरेबा। 4 थे रिल्सी थान्बा किताब ब्लसी च्याखम्बा म्हि खालैनोन आस्यापबासे लमा डा ल्हानान क्राजी। 5 जमाहेन्से गन्बागदे न्हडला गिकसे डादा “थाक्रागो, च्यागो, यहूदा यहूलला दाऊद वंशग्याम थोन्बा च्यानसेन ढाबा मुला। चु किताबला ग्ला निसला लाहा छाप ब्लसी ठोड्बाधोनाला म्हि चा थेनोन हिन्ना” भिसी भिजी।* 6 जमाहेन्से साइबा थार्बा पिन्बा ग्यु बोगो† ह्ङ्बान खालैदा परमेश्वरला ठिला गुडरी राप्सी चिबा डाइ म्राङ्जी। थेला क्युर्सीन गोर ब्लि जन्तुगदेदेन गन्बागदे मुबा। थेला गोर निस रुदेन गोर निस मी मुबा। चु चा जम्बुलिडला जम्मान ग्लारी पुइखबा परमेश्वरला आत्मा निस हिन्ना।* 7 थे फेप्सी मुल ठिरी धन्छ्याबाला दाहिने छ्याग्याम थे रिल्सी थान्बा किताबला मुठा किन्जी। 8 थेसे थे रिल्सी थान्बा किताबला मुठा किन्माहेन्से थे गोर ब्लि छोन्बो जन्तुदेन बोगल गिकसे ब्लि गन्बागदेसे थार्बा पिन्बा ग्यु बोगोदा फ्या लजी। जम्मालान यारी वीणादेन ज्यबा बास्ना खबा धूपसे प्लिङ्बा म्हरला पोइमो ताड मुबा। थे ज्यबा बास्ना खबा धूप चा परमेश्वरला म्हिगदेसे लबा प्रार्थना हिन्ना।* 9 थेनीगदेसे चुह्ङ् भिसी छार व्हाइ गिक गोजी,

“चु रिल्सी थान्बा किताबला मुठा किन्सी

लाहा छाप ब्लबादेन ठोड्बाधोनाला हाड जे मुला।

तिग्दा भिसम हाडदा साइबा मुबा,

ओच्छे हाडला कासे जम्मान वंश, ग्योइ, म्हि, यहूलदेन यहुल्सादा पापला सय फासी परमेश्वरला लागिरी ग्लुजी।*

* 5:5 उत्प ४९:९; यशै ११:१, १० † 5:6 च्यानदेन थार्बा पिन्बा ग्यु बोगो भिबा चा येशू ख्रीष्टदा पाड्बा हिन्ना। * 5:6 यशै ५३:३; जक ४:१० * 5:8 भजन १४१:२

* 5:9 भजन ३३:३; ९८:१; यशै ४२:१०

10 य्हाडला परमेश्वरदा तेन्गै भिसी

ह्वाडसे थेनीगदेदा परमेश्वरदा पूजा लबा य्हुल गिक स्होबा मुला।

ओच्छे थेनीगदेसे जम्बुलिडरी शासन लला।”*

11 दोःसी डाइ च्यामा, परमेश्वरला ठिदेन जन्तुगदे ओच्छे गन्बागदेला क्युर्सीन ल्हानान स्वर्गदूतगदेसे व्हाइ गोबा म्हाड्जी। थेनीगदे लाख, करोड झ्यानोन आखम्बाधोना मुबा।* 12 थेनीगदेसे घेन काइरी चुहड् भिसी व्हाइ गोबान मुबा,

“जम्मालान लागिरी बलि तबा थार्बा पिन्बा ग्यु बोगो जे जम्मान शक्ति, धन सम्पत्तिदेन ज्ञान बुद्धि, ओच्छे भड, मान, य्हाल य्हालदेन जयजयकार किन्खम्बाधोनाला मुला।”

13 ओच्छे स्वर्गदेन जम्बुलिड ओच्छे जम्बुलिड धिरी, समुन्द्रीदेन थेरी मुबा जम्मान जन्तुगदेसे चुहड् भिसी व्हाइ गोबान लबा डाइ म्हाड्जी।

“ठिरी धन्छ्याबादेन थार्बा पिन्बा ग्यु बोगोदा सदन सदन जयजयकार, मानदेन य्हाल य्हाल, ओच्छे शक्ति तगै।”

14 जमाहेन्से थे गोर बलि छोन्बो जन्तुसे “आमेन” भिजी। ओच्छे थे गन्बागदेसे चा फ्या लबान जयजयकार लजी।

6

लाहा छाप बलबा

1 जमाहेन्से डाइ थे गोर निस लाहा छाप न्हडला छाप गिक थार्बा पिन्बा ग्यु बोगोसे बलबा म्हाड्जी। थेनोन धुइरी थे गोर बलि छोन्बो जन्तुगदे न्हडला गिकसे मु घुर्बा हड्बान काइरी

* 5:10 प्रस्था १९:६; उन्बा १:६ * 5:11 दानि ७:१०

“खउ” भिसी पाङ्बा डाइ प्राङ्जी। ² जमाहेन्से डाइ तार ता गिक प्राङ्जी। थे ताथोरी मुबा म्हिसे म्यादली गिक थोबा मुबा। थेदा मुकुट गिक पिन्जी, ओच्छे थे ढाबाला लागिरी ढाबा म्हि दोःसी थेंग्याम भ्रजी।*

³ थार्बा पिन्बा ग्यु बोगोसे दोःसी न्हीरिमला लाहा छाप ब्लमा अर्गु जन्तु गिकसे “खउ” भिसी पाङ्बा डाइ थेःजी। ⁴ जमाहेन्से डाइ वाला ता गिक प्राङ्जी। थे ताथोरी मुबा म्हिदा म्हिगदे न्हडरी गिकसेम गिकदा साइगै भिसी जम्बुलिङ्ग्याम शान्ति ब्यन्सी भोर्बा अधिकार पिन्जी। ओच्छे थेदा घेन तरवार गिकएनोन पिन्जी।*

⁵ दोःसी थार्बा पिन्बा ग्यु बोगोसे सोमरेमला लाहा छाप ब्लजी। थे धुइरी डाइ अर्गु जन्तुसे “खउ” भिसी पाङ्बा प्राङ्जी। जमाहेन्से डाइ म्लाङ्गै ता गिक प्राङ्जी। थे ताथोरी मुबा महिला यारी उमाल गिक मुबा। ⁶ डाइ थे गोर ब्लि छोन्बो जन्तुगदेला गुङ्ग्याम चुहङ्ग् भिबा काइ थेःजी। “तिरेला ज्यालासे ग्वा ग्लुबा हिन्सम किलो नाङ्ग ओच्छे जौ ग्लुबा हिन्सम किलो सोम ग्लुबारी खम्ला। तर छ्युगुला दोडदेन अङ्गुरला दोडदा चा न्होङ्गना थालउ।

⁷ ओच्छे थार्बा पिन्बा ग्यु बोगोसे ब्लिरेमला लाहा छाप ब्लजी। थे धुइरी डाइ अर्गु जन्तुसे “खउ” भिसी पाङ्बा प्राङ्जी। ⁸ जमाहेन्से डाइ उर ता गिक प्राङ्जी। थे ताथोरी क्रेःबा महिला मिन चा “काल” मुबा। ओच्छे थेला लिच्छा लिच्छा चा सिबा म्हिगदेला आत्मा चिबा ग्ला मुबा। थेनीगदेदा लडाइ, अनिकाल, देसानदेन जम्बुलिङ्गला हि जन्तुगदेग्याम जम्बुलिङ्गला भो ब्लिरी भो गिकदा नाश लबा अधिकार पिन्बा मुबा।*

* 6:2 जक १:८; ६:३, ६ * 6:4 जक १:८; ६:२ * 6:8 उन्बा १:१८; इज १४:२१

9 थेहड् लसीन थार्बा पिन्बा ग्यु बोगोसे डारेमला लाहा छाप बल्जी। थे धुइरी डाइ धूप म्बाबा ग्लाला धिरी परमेश्वरला बचनदेन परमेश्वरला बारैरी थे:ना लबासे लमा स्य्हान्दोसे साइबा म्हिगदेला आत्मागदे म्बाड्जी। 10 ओच्छे थेनीगदेसे घेन काइरी क्रिड्बान, “जम्मान भन्दा घेन ओच्छे जम्मान भन्दा चोखोदेन सत्य प्रभु, हाडसे उन्दा साइबा जम्बुलिडरी मुबा म्हिगदेला ठीक निसाफ खाइमा लसी थेनीगदेदा सजाय पिन्ना?” भिसी भिजी। 11 थेनीगदे जम्मादान गोर गिक गिक तार क्वान पिन्जी। ओच्छे थेनीगदेदा एनीगदेदा हड् लसी साइतो:बा येशूदा तेन्बा एनीगदेला जम्मान होदेन ज्योज्यो आले नाना आडागदेदाएनोन आसाइतेधोना भ्रान्गो भिसी भिजी।

12 जमाहेन्से डाइ थार्बा पिन्बा ग्यु बोगोसे डुरेमला लाहा छाप बल्बा म्बाड्जी। थे धुइरी घेन सड्गुल खजी। ओच्छे धिनी म्लाड्गै क्वान हड्बान धोपधोप तजी, लनी चा का हड्बान वाला तजी।* 13 लाबालुडसरसे अज्जीरला दोड य्होड्मा आचिप्बा रोगदे ताइबा हड् लसी मुला सारगदे जम्बुलिडरी ताइजी।* 14 मु चा कागज हड्नोन रिल्बान म्हासी निजी। ओच्छे गड्गदेदेन समुन्द्रला गुडरी मुबा ग्लागदे चा हाड हाडला ग्लाग्याम ले:जी।* 15 जमाहेन्से जम्बुलिडला ग्लेगदे, शासन लबागदे, सिपाहीला कप्तानगदे, फ्युक्पो म्हिगदे, अधिकार मुबा म्हिगदे, नोकरगदेदेन अर्गु जम्मान म्हिगदे गड् गडला उगदेदेन पहरागदेरीक्यार लाजी।* 16 थेनीगदेसे गड्देन पहरागदेदा चुहड् भिसी भिजी, “ठिरी धन्छ्याबादेन थार्बा पिन्बा ग्यु बोगोला बोमोग्याम उन्दा छुम्सी जोगब लउ।* 17 तिग्दा भिसम ठिरी धन्छ्याबादेन थार्बा पिन्बा ग्यु बोगोसे

* 6:12 उन्बा ११:१३; १६:१८; यशै १३:१०; योए २:१०, १३; ३:१५; मत्ती २४:२९; मर्कू १३:२४-२५; लूका २१:२५ * 6:13 यशै ३४:४ * 6:14 उन्बा १६:२० * 6:15 यशै २:१९, २१ * 6:16 होशे १०:८; लूका २३:३०

निसाफ लसी घेन सजाय पिन्बा धिन खसी जिन्बा मुला। थे धिनना दुख खाल्से नाखम्ला?***

7

लाख गिकसे बोगल न्हीसे हजार ब्लीदा छाप लबा

1 जमाहेनसे डाइ गोर ब्ली स्वर्गदूतगदेदा जम्बुलिडरी, समुन्द्ररी ओच्छे खजिबै दोडरी लाबा थाखगै भिसी जम्बुलिडलापट्टि ब्लीग्यामसेन खबा लाबादा रोकब लबान जम्बुलिडला कुनी ब्लीरी राप्सी चिबा म्राङ्जी।* 2 ओच्छे डाइ छोन्बो परमेश्वरला छाप पुइसी स्यारग्याम स्यहान्दो स्वर्गदूत गिक खबान लबा म्राङ्जी। थेसे जम्बुलिडदेन समुन्द्रदा न्होङ्ना लबारी परमेश्वरग्याम अधिकार याङ्बा थे गोर ब्ली स्वर्गदूतगदेदा घेन काइरी चुहङ् भिसी भिजी, 3 “ङन्से यहाङला परमेश्वरला गे लबा म्हिगदेला डोरी छाप आलतेधोना जम्बुलिडदेन समुन्द्र ओच्छे दोङ्गदेदा न्होङ्ना थालउ।”* 4 ओच्छे डाइ परमेश्वरला छाप लबा म्हिगदे गाते मुला भिसी पाङ्बा थे:जी। जमा इस्राएलला जम्मान वंशग्याम लसी लाख गिकसे बोगल न्हीसे हजार ब्ली मुबो।

5 यहूदाला वंशग्याम च्युक न्ही हजारदा,

रूबेनना वंशग्याम च्युक न्ही हजारदा,

गादला वंशग्याम च्युक न्ही हजारदा,

6 आशेर वंशग्याम च्युक न्ही हजारदा,

नप्तालीला वंशग्याम च्युक न्ही हजारदा,

मनश्शेला वंशग्याम च्युक न्ही हजारदा,

7 शिमियोनला वंशग्याम च्युक न्ही हजारदा,

लेवीला वंशग्याम च्युक न्ही हजारदा,

* 6:17 योए २:११; मला ३:२

* 7:1 यर्मि ४९:३६; जक ६:५

* 7:3 इज ९:४-६

इस्साखारला वंशग्याम च्युक न्ही हजारदा,
 8 जबूलूनना वंशग्याम च्युक न्ही हजारदा,
 योसेफला वंशग्याम च्युक न्ही हजारदा
 बेन्यामीनला वंशग्याम च्युक न्ही हजार
 म्हिदा छाप लजी।

तार क्वान क्वान्बागदेला हुल

9 जमाहेन्से डाइ खालै म्हिसे झ्यासीन झ्याबारी आखम्बा
 म्हिला हुल गिक म्राड्जी। थेनीगदे जम्मान य्हुल्सादेन वंश ओच्छे
 य्हुलदेन ग्योइ पाड्बा म्हिगदे मुबा। थेनीगदे तार क्वान क्वान्सी
 यारी खजूरला हाँगा थोसी मुल ठिदेन थार्बा पिन्बा ग्यु बोगोला
 डाच्छापट्टि राप्सी चिबा मुबा। 10 थेनीगदेसे घेन काइरी चुहड् भिसी
 भिजी,

“ठिरी धन्छ्याबा य्हाडला परमेश्वरदेन
 ग्यु बोगोग्यामसेन य्हाडसे थार्बा याड्ला।”

11 ओच्छे ठि, गन्बागदेदेन थे गोर बलि छोन्बो जन्तुला क्युर्नोन
 जम्मान स्वर्गदूतगदे राप्जी, ओच्छे ठिला डाच्छापट्टि ख्लुप तसी
 परमेश्वरला जयजयकार लजी।

12 “आमेन! य्हाडला परमेश्वरदा सदन सदन

जयजयकारदेन य्हाल य्हाल, बुद्धि, धन्यवाद, मान
 ओच्छे शक्तिदेन भड तगै। आमेन!”

13 गन्बागदे न्हडला गिकसे डादा “तार क्वान क्वान्बा म्हिगदे
 खाल हिन्ना, ओच्छे थेनीगदे खानडग्याम खबा हिन्ना?” भिसी
 ड्योइजी।

14 डाइ थेदा “गुरु, थे मी हाडदान था मुला” भिसी भिमा
 थेसे डादा चुहड् भिसी पाड्जी, “थेनीगदे चा ल्हानान दुख
 नासी खबा म्हिगदे हिन्ना। थेनीगदेसे हाड हाडला क्वान

थार्बा पिन्बा ग्यु बोगोला कासे खुसी तार तना लबा मुला।*
 15 थेतबासेलमा थेनीगदे परमेश्वरला ठिला डाच्छापट्टि मुला,
 ओच्छे थेनीगदेसे धिन म्हुननोन परमेश्वरला मन्दिररी थेदा
 तेन्मुला। ठिरी धन्छ्याबासे चा थेनीगदेला गुडरी धन्छ्यासी
 थेनीगदेदा जोगब लला। 16 दाहेन्से थेनीगदेदा फो खेन्बै आत,
 क्युइ फुइबाएनोन आत। ओच्छे थेनीगदेदा धिनीला रापदेन अर्गु
 खजिबै स्हेला रापसे आक्रो।* 17 तिग्दा भिसम ठिला गुडरी
 धन्छ्याबा थार्बा पिन्बा ग्यु बोगो थेनीगदेला गोठालो दोला।
 ओच्छे थेसेन थेनीगदेदा जुकजुकधोनाला जुनी पिन्बा क्युइला
 मुलरी भोर्ला। ओच्छे परमेश्वरसेन थेनीगदेला जम्मान मीख्ली
 फ्यासी पिन्ना।”*

8

निसरेमला लाहा छापदेन म्हरला पोइमो ताड

1 थार्बा पिन्बा ग्यु बोगोसे निसरेमला लाहा छाप बलमा
 स्वर्गरी ओस्पन घण्टा गडसलधोना सुनसान तजी। 2 जमाहेन्से
 डाइ परमेश्वरला डाच्छा राप्सी चिबा गोर निस स्वर्गदूतगदेदा
 म्राङ्जी। ओच्छे थेनीगदेदा गोर निस बिगुल पिन्जी। 3 ओच्छे
 स्य्हान्दो स्वर्गदूत गिक म्हरला पोइमो ताड थोसी धूप म्राबा
 ग्लाला डामरी राप्जी। ठिला डाच्छापट्टि मुबा म्हरला धूप म्राबा
 ग्लारी परमेश्वरला म्हिगदेला प्रार्थनादेन छ्यामनोन फुल्बाला
 लागिरी थेदा ल्हानान धूप पिन्जी।* 4 स्वर्गदूतला याग्याम ज्यबा
 बास्ना खबा धूपला म्युगु परमेश्वरला म्हिगदेला प्रार्थनादेन
 छ्यामनोन परमेश्वरला डाच्छा तोर निजी। 5 जमाहेन्से थे
 स्वर्गदूतसे पोइमो ताड थोसी धूप म्राबा ग्लाला मे पोइमो

* 7:14 दानि १२:१; मत्ती २४:२१; मर्कू १३:१९ * 7:16 यशै ४९:१० * 7:17
 भजन २३:१; इज ३४:२३; भजन २३:२; यशै ४९:१०; २५:८ * 8:3 आमो ९:१; प्रस्था
 ३०:१, ३

ताडरी युसी जम्बुलिडरी भ्याङ्जी। ओच्छे गडङ्गुडुड मु ठेङ्सी तिप्लीड खसी सङ्गुल निजी।*

बिगुलगदे

6 जमाहेन्से थे बिगुल थोबा गोर निसनोन स्वर्गदूतगदे बिगुल हापबारी ठीक तजी।

7 जमाहेन्से जम्मान भन्दा डाच्छापट्टि मुबा स्वर्गदूत गिकसे हाडला बिगुल हापजी। थेनोन धुइरी का दोड्बा सेर्बादेन मे जम्बुलिडरी ल्हानान ताइजी। थेतबासेलमा जम्बुलिडला भो सोमरी भो गिक दोड्गदेला भो सोमरी भो गिक ओच्छे जम्मान छेगदेएनोन क्रोजी।

8 न्हीरेमला स्वर्गदूतसे हाडला बिगुल हापबा धुइरी मे लुड्बा घेन गड हड्बा सहे गिक समुन्द्ररी भ्याङ्जी। ओच्छे समुन्द्रला क्युइ भो सोमरी भो गिक का दोजी। 9 ओच्छे समुन्द्ररी मुबा जम्मान जन्तुगदे भो सोमरी भो गिक सिजी। थेहड् लसीन पानी जहाजगदेएनोन भो सोमरी भो गिक नाश तजी।

10 थेहड् लसीन सोमरेमला स्वर्गदूतसे हाडला बिगुल हापजी। थेनोन धुइरी लुड्बा मेला ल्हाम हड्बान घेन सार गिक मुग्याम भो सोम स्योड्गदेला भो गिकरीदेन क्युइला मुहानगदेरी ताइजी।* 11 थे सारला मिन “कम्बा” मुबा। थे सारसे भो सोम क्युइरी भो गिक कम्ना लजी। थे कम्बा क्युइ थुड्बा ल्हानान म्हिगदे सिजी।

12 दोःसी ब्लिरेमला स्वर्गदूतसे हाडला बिगुल हापजी। थेनोन धुइरी धिनी, लनीदेन सारगदेला भो सोमला भो गिकरी तिगै सहेसे तोजी। जमाहेन्से थेनीगदेला भो सोमरी भो गिक धोप तजी। चुहड् लसी धिनदेन म्हुनएनोन भो सोमरी भो गिक धोपधोप तजी।

* 8:5 लेवी १६:१२; इज १०:२; प्रस्था १९:१६; उन्बा ११:१९; १६:१८ * 8:10 यशै १४:१२

13 डाइ च्याबान लमा मुरी ग्वाइ गिक फ्याड्बान लबा म्राङ्जी। थे ग्वाइसे क्रिड्बान चुहड् भिसी भिजी, “दुखन दुख, जम्बुलिडरी मुबा म्हिगदेदा ल्हानान दुख तला। तिग्दा भिसम दाहेन्से बिगुल हापबारी बाँकी मुबा अर्गु गोर सोम स्वर्गदूतसे बिगुल हापबा धुइ तसी जिन्बा मुला।”

9

1 दोःसी डारेमला स्वर्गदूतसे हाडला बिगुल हापबा धुइरी डाइ मुग्याम जम्बुलिडरी सार गिक ताइबान लबा म्राङ्जी। थे सारदा ल्हानान नुप्बा व्हाडला[†] म्रापला साँचो पिन्जी। 2 थे सारसे ल्हानान नुप्बा व्हाडला म्राप ठोड्मा थेंग्याम मेला घेन खाराड्ग्याम थोन्बा हड्बान म्युगु थोन्जी। थे म्युगुसे लमा धिनीदेन मु धोप तना लजी।* 3 जमाहेन्से थे म्युगु न्हड्ग्याम तिरीगदे थोन्सी जम्बुलिडरी खजी। थे तिरीगदेदा बिच्छीगदेसे जिबा हड्बान जिबा शक्ति पिन्जी।* 4 जम्बुलिडला छे स्याउलादेन दोड्गदेदा तिगै न्होड्ना थालउ। तर डोरी परमेश्वरला छाप आरेबागदेदा जे दुख पिन्गो भिसी थे तिरीगदेदा कुल्बा मुबा।* 5 थेनीगदेदा साइनोन चा थासाइगो, तर ला डाधोना दुख पिन्गो भिसी थे तिरीगदेदा अधिकार पिन्जी। थे तिरीगदेसे पिन्बा दुख चा म्हिदा बिच्छीसे जीमा सह् खबा हड्बान सह् खमुबा। 6 थे धुइरी म्हिगदे सिबारी म्हाइला, तर थेनीगदे सिआम्याड्। थेनीगदेसे सिबारी म्हाइला, तर काल चा थेनीगदेग्याम यार्ला।*

7 थे तिरीगदे लडाइ लबाला लागिरी निबारी ठीक तबा तागदे हड्बान म्राड्मुबा। थेनीगदेला थोबोरी म्हरला मुकुट हड्बा सह् मुबा। ओच्छे थेनीगदेला ली चा महिला ली हड्बान मुबा।*

† 9:1 चु पदरी “ल्हानान नुप्बा व्हाड” भिबा चा म्हड म्हड चिबा गुला हिनना (लूका ८:३१; रोमी १०:७; उन्बा ९:२, ११; ११:७; १७:८; २०:१, ३)। * 9:2 उत्प १९:२८

* 9:3 प्रस्था १०:१२-१५ * 9:4 इज ९:४ * 9:6 अय्यूब ३:२१; यर्मि ८:३

* 9:7 योए २:४

8 थेनीगदेला क्रा भ्रिडम्हेमेला क्रा हड्बान हेड्बा मुबा, ओच्छे स्वा चा च्यानना स्वा हड्बान मुबा।* 9 थेनीगदेला कुरी फाइला ढाल क्वान्बा मुबा। ओच्छे थेनीगदे फ्याड्मा भ्यापग्याम लडाइरी ल्हानान रथदेन तागदे छयोड्मा खबा हड्बान आवाज खमुबा।* 10 थेनीगदेला मेःरी चा बिच्छीला हड्बान दुम मुबा। थेनीगदेला मेःरी म्हिगदेदा ला डाधोना दुख पिन्बा शक्ति मुबा। 11 थेनीगदेदा शासन लबा ग्ले चा ल्हानान नुपुबा व्हाडला दूत मुबा। थे दूतला मिन हिबू ग्योइरी एबाड्डोन मुबा ओच्छे ग्रीक ग्योइरी अपोल्लियोन मुबा।†

12 दुख गिक निसी जिन्जी। तर च्यागो, दोःसी अझ दुख न्ही खबारी बाँकी मुला।

13 दुरेमला स्वर्गदूतसे हाडला बिगुल हापुमा डाइ परमेश्वरला डाच्छा मुबा म्हरला धूप म्नाबा ग्लाला कुनी बलिग्याम चुहड् भिबा काइ थेःजी।* 14 थे बिगुल हापुबा दुरेमला स्वर्गदूतदा चुहड् भिबा डाइ थेःजी, “यूफ्रेटिस भिबा घेन स्योडरी खीसी थान्बा स्वर्गदूत बलिदा बलसी पिन्गो।” 15 चुनोन धुइ, चुनोन धिनकुनु, चुनोन ला, चुनोन दिडला लागिरी ठीक लसी थान्बा थे स्वर्गदूत बलिदा जम्बुलिडरी मुबा म्हिगदेला भो सोमरी भो गिकदा साइबाला लागिरी पुइबा हिन्ना। 16 थेरी ताथोरी क्रेःबा सिपाहीगदे गाते मुला भिबा तामएनोन डादा पाड्जी। थेरी ताथोरी क्रेःसी खबा सिपाहीगदे बोगल गिक करोड मुबा।

17 डाइ म्नाड्बा तादेन ताथोरी क्रेःबा सिपाहीगदे चुहड्बा मुबा, थेनीगदेला कुरी क्वान्बा ढालगदे चा मे हड्बान वाला ओच्छे पिडगैदेन गन्धक हड्बान उर मुबा। थे तागदेला थोबो च्यानना हड्बान मुबा। थेनीगदेला सुडग्याम मे, म्युगुदेन गन्धक थोन्मुबा।

* 9:8 योए १:६ * 9:9 योए २:५ † 9:11 चु मिनना अर्थ चा नाश लबा म्हि हिन्ना। * 9:13 प्रस्था ३०:१-३

18 थेनीगदेला सुडग्याम थोन्बा मे, म्युगुदेन गन्धकला आपत विपत सोमग्याम जम्बुलिडरी मुबा भो सोम न्हडला भो गिक म्हिगदे साइजी। 19 तिग्दा भिसम थे तागदेला सुडदेन मेःरी शक्ति मुबा। थेनीगदेला मेः चा बिख मुबा पुखीला थोबो हड्बान मुबा। ओच्छे थेनीगदेसे म्हिगदेदा मेःदेन थोबोसे पोर तना लमुबा।

20 तर चुहड्बा आपत विपतग्याम आसिना जोगब तबा म्हिगदेसे हाड हाडसे लबा आज्यबा गे ख्लासी परमेश्वरपट्टि आदोःनी। ओच्छे थेनीगदेसे म्हड म्हडदेन म्राड्आखम्बा, थेःआखम्बा, भ्रआखम्बा म्हर, म्हुइ, काँस, युडबादेन सिडग्याम स्होबा मूर्तिगदेदा तेन्बा आख्लानी।* 21 थेहड् लसीन थेनीगदेसे म्हि साइबा, टुनामुना लबा, स्य्हान्दोदेन छ्याम ब्रेल्सी भ्रबादेन य्हो लबा हड्बा आज्यबा गेगदे ख्लासी परमेश्वरपट्टि आदोःनी।

10

रिल्सी थान्बा जजाबा किताबला मुठा थोबा स्वर्गदूत

1 जमाहेन्से डाइ स्य्हान्दो शक्तिशाली स्वर्गदूत गिक स्वर्गग्याम फाप्वान लबा म्राड्जी। थेसे खसुला क्वान क्वान्बा मुबा, ओच्छे थेला थोबोरी लरक्युड मुबा। थेला ली धिनी हड्बान मुबा, ओच्छे काड चा मेला ल्हाम हड्बान मुबा। 2 ओच्छे थेला यारी बल्सी थान्बा जजाबा किताब मुबा। थेसे हाडला दाहिने काड समुन्द्ररी ओच्छे देब्रे काड सरी थान्सी राप्जी। 3 थे स्वर्गदूत च्यान इहार्बा हड् लसी घेन काइरी क्रिड्जी। ओच्छे थेसे चुहड् लसी क्रिड्मा गोर निस मु गुडुडबासे पाड्जी। 4 थे थेःमैछ्याम डाइ भ्रिबारी छ्याइमुबा। तर स्वर्गग्याम “गोर निस मु गुडुडबासे पाड्बा ताम थाभ्रिउ, तर चु ताम एला सेमरी थान्गो” भिबा डाइ थेःजी।

* 9:20 भजन ११५:४-७; १३५:१५-१७; दानि ५:२३

5 ओच्छे ह्वाडला काड समुन्द्रदेन सरी थान्सी राप्बा थे शक्तिशाली स्वर्गदूतसे ह्वाडला दाहिने या स्वर्गपट्टि थीजी।*
6 ओच्छे स्वर्ग, जम्बुलिडदेन समुन्द्र सहोबा ओच्छे थेरी मुबा जम्मान सहेगदे सहोबा सदन सोसी चिबा परमेश्वरला मिनरी घान फाबान थे स्वर्गदूतसे चुहड् भिसी भिजी, “दाहेन्से आघड, 7 तर निसरेमला स्वर्गदूतसे ह्वाडला बिगुल हाप्बारी छ्याइबा धुइरी परमेश्वरसे ह्वाडला गे लबा अगमवक्तागदेदा सुड्बा म्हिसे था आयाड्बा ताम पूरा तला।”

8 जमाहेन्से डाइ थे:बा स्वर्गग्याम खबा थे काइसे दो:सी डादा चुहड् भिसी भिजी, “निउ! समुन्द्ररीदेन सरी काड थान्सी राप्बा थे स्वर्गदूतला यारी मुबा बल्सी थान्बा थे किताब किन्गो।”*

9 ओच्छे डाइ थे स्वर्गदूत मुबा ग्लारी निसी थे रिल्सी थान्बा किताबला मुठा हीजी। जमाहेन्से थेसे डादा “ना, चु चउ! एला सुडरी खुदु ह्ङ्गोन केकेला। तर चु ग्लोड्माहेन्से एला फो न्होड्ना लला” भिसी भिजी। 10 थे स्वर्गदूतला याग्याम डाइ थे रिल्सी थान्बा किताबला मुठा किन्सी चजी। थे चमा डाला सुडरी खुदु ह्ङ्गोन केकेजी, तर चसी जिन्माहेन्से कम्सी डाला फो न्होड्जी। 11 जमाहेन्से थेसे डादा “एसे ल्हानान म्हिगदे, ल्हानान य्हुल, ल्हानान य्हुल्सा, ल्हानान ग्योइदेन ल्हानान ग्लेगदेला बारिरी परमेश्वरसे उन्बा ताम दो:सी पाड्तो:ला” भिसी पाड्जी।

11

परमेश्वरला गे म्राड्बा न्ही

1 जमाहेन्से डादा दप्बा सहे ह्ङ्गबान माला कडी गिक पिन्जी। ओच्छे थेसे डादा चुहड् भिसी भिजी, “रे:सी परमेश्वरला मन्दिरदेन थेरी धूप म्राबा ग्ला दप्गो। ओच्छे थेरी पूजा लबा म्हि गाते

* 10:5 प्रस्था २०:११; वयव ३२:४०; दानि १२:७; आमो ३:७ * 10:8 इज २:८-३:३

चीम झ्यागो।* 2 तर परमेश्वरला मन्दिरला खाडगा चा थादपुगो। तिग्दा भिसम थे ग्ला चा अर्गु यहुलला म्हिगदेदा पिन्बा मुला। थेनीगदेसे बोगल न्हीसे ला न्हीधोना परमेश्वरला शहररी रजाई लला।* 3 ओच्छे डाला गे स्य्हान्दो म्हिदा उन्बा म्हि न्हीदा हजार गिकसे ग्यार्जा न्हीसे बोगल सोम धिनधोना बोराला क्वान क्वान्सी परमेश्वरला ताम पाड्बा अधिकार पिन्ना।”

4 डाला गे स्य्हान्दो म्हिदा उन्बा न्ही चा जम्बुलिड नाडनोन शासन लबा प्रभुला डाच्छापट्टि मुबा जैतूनना दोड न्हीदेन नाडसल थान्बा ग्ला न्ही हिन्ना। 5 चुदे खालै शत्रुसे थेनीगदेदा न्होड्ना लबारी म्हाइजी भिसम थेनीगदेला सुडग्याम थोन्बा मेसे थेनीगदेला शत्रुदा नाश लला। थेतबासेलमा चुदे खालै म्हिसे थेनीगदेदा न्होड्ना लबारी म्हाइजी भिसम थेनीगदेदाएनोन थेहड् लसीन साइला। 6 थेनीगदेसे परमेश्वरसे उन्बा ताम पाड्बा धुइधोना नाम थाखगै भिसी मु दुडबादेन क्युइदा काधोना लबा शक्ति थेनीगदेदेन छ्याम मुला। ओच्छे थेनीगदेसे म्हन्बा धुइरी जम्बुलिडरी थरी थरीला आपत विपत तना लबा शक्तिएनोन थेनीगदेदेन छ्याम मुला।*

7 थेनीगदेसे परमेश्वरसे उन्बा ताम पाड्सी जिन्माहेन्से ल्हानान नुपबा व्हाड्ग्याम थोन्सी खबा लोड्बा खबा जन्तुसे थेनीगदेदेन छ्याम लडाइ लसी थेनीगदेदा भेना लसी साइला।* 8 थेनीगदेला लास थेनीगदेला प्रभुदा क्रुसरी टाँगब लसी साइबा ग्लाला घेन शहरला ग्यामरीन थान्ना। थे शहर चा सदोमदेन मिश्र यहुल्सा हड्बान हिन्ना।* 9 जम्मान यहुल्साला म्हिगदे, जम्मान वंशला म्हिगदे, जम्मान ग्योइ पाड्बा म्हिगदेदेन जम्मान यहुलला म्हिगदेसे थेनीगदेला लास सोमरेसे धिन गडसालधोना च्याला।

* 11:1 इज ४०:३; जक २:१-२ * 11:2 लूका २१:२४ * 11:6 १ राजा १७:१; प्रस्था ७:१७-१९; १ शमू ४:८ * 11:7 दानि ७:७, २१; उन्बा १३:५-७; १७:८ * 11:8 यशै १:९-१०

ओच्छे थेनीगदेला लास ल्हुआपुड। ¹⁰ चु न्हीदा साइबा म्राड्सी जम्बुलिडला म्हिगदे ताड्सी हाड हाड न्हडरी गिकसेम गिकदा उपहार पिन्बा किन्बा लला। तिग्दा भिसम चु अगमवक्ता न्हीसे जम्बुलिडला म्हिगदेदा ल्हानान दुख पिन्बा मुबा।

¹¹ तर सोमरेसे धिन गडसल तमाहेन्से जुनी पिन्बा सा परमेश्वरग्याम खसी थेनीगदे न्हडरी वाड्जी। ओच्छे थेनीगदे सिबाग्याम सोसी डोड रेःजी, थे म्राड्सी म्हिगदे ल्हानान लोड्जी।*
¹² जमाहेन्से थे अगमवक्ता न्हीसे स्वर्गग्याम “तोर खउ” भिबा घेन काइ थेःजी। जमाहेन्से थेनीगदेला शत्रुगदेसे च्यान च्यानान थेन्नी खसु न्हडग्याम तबान स्वर्गरी निजी।*

¹³ थेनोन धुइरी घेन सडगुल खसी शहरला भो च्युइला भो गिक दिमगदे नाश लजी। थे सडगुल खमा हजार निस म्हिगदे सिजी। ओच्छे आसिबा म्हिगदेसे चा ल्हानान लोड्सी स्वर्गरी धन्छ्याबा परमेश्वरदा मानदेन जयजयकार लजी।*

¹⁴ न्हीरेमला आपत विपत निसी जिन्जी। तर च्यागो, सोमरेमला आपत विपत योनान खला।

निसरेमला बिगुल

¹⁵ ओच्छे निसरेमला स्वर्गदूतसे हाडला बिगुल हाप्जी। थेसे हाडला बिगुल हापमा स्वर्गरी घेन घेन काइगदेरी चुहड् भिसी भिबान मुबा,

“दाहेन्से जम्बुलिडथोरी शासन लबा अधिकार यहाडला परमेश्वरदेन थेसे धम्बा थार्बा पिन्बा ख्रीष्टलान हिन्ना।
थेसे सदनना लागिरी शासन लला।”*

* 11:11 इज ३७:१० * 11:12 २ राजा २:११ * 11:13 उन्बा ६:१२; १६:१८

* 11:15 प्रस्था १५:१८; दानि २:४४; ७:१४, २७

16 जमाहेन्से परमेश्वरला डाच्छा हाड हाडला ठिरी चिबा थे बोगल गिकसे गोर बलि गन्बागदेसे परमेश्वरदा फ्या लसी जयजयकार लजी। 17 ओच्छे थेनीगदेसे चुहड् भिसी भिजी, “जम्मान भन्दा घेन परमप्रभु परमेश्वर,

हाड डाच्छाएनोन मुबा ओच्छे दान्देनोन मुला।
हाडदा डन्ना ल्हानान धन्यवाद मुला।

तिग्दा भिसम हाडसे हाडला घेन अधिकार किन्सी शासन लबारी छ्याइबा मुला।

18 यहुल यहुलला म्हिगदेदा ल्हानान बोमो खबा मुबा, तर दाहेन्से हाडदाएनोन बोमो खबा धुइ तबा मुला।

दाहेन्से सिबागदेला निसाफ लबा धुइएनोन तबा मुला, ओच्छे हाडसे हाडला गे लबा अगमवक्तागदेदेन हाडला म्हिगदे,

ओच्छे हाडदा मान लबा जजा घेन जम्मान म्हिगदेदा इनाम पिन्बा धुइएनोन तबा मुला,

ओच्छे जम्बुलिड नाश लबागदेदा नाश लबा धुइएनोन तबा मुला।”*

19 जमाहेन्से स्वर्गरी मुबा परमेश्वरला मन्दिर ठोड्जी। ओच्छे परमेश्वरसे लबा कबुल थान्बा सन्दोस म्राड्जी। जमाहेन्से तिप्लीड खसी गडडगुडुड भिसी मु ठेड्बा थे:जी। ओच्छे सडगुल निसी घेन घेन सेर्बा ताइजी।*

12

यूहन्नासे म्राड्बा म्रिडम्हेमेदेन अजिड्गर

1 जमाहेन्से डाइ स्वर्गरी उदेकला चिनु गिक म्राड्जी। ओच्छे डाइ धिनी क्वान्बादेन काड धिरी लनी मुबा च्युक न्ही सारला

† 11:18 “यहुल यहुलला म्हिगदे” भिबा चा अर्गु यहुलला म्हिगदे हिन्ना। * 11:18

भजन २:५; ११०:५; ११५:१३ * 11:19 उन्बा ८:५; १६:१८-२१

मुकुट कूबा म्रिडम्हेमे गिक म्राङ्जी। ² थे म्रिडम्हेमे जिउ न्हीला मुबा, ओच्छे बेथा याङ्बासे लमा थे क्रिङ्बान मुबा। ³ ओच्छे डाइ दोःसी स्वर्गरी उदेकला चिनु गिक म्राङ्जी। च्यागो, गोर निस थोबोदेन गोर च्युइ रु मुबा वाला घेन अजिङ्गर गिक म्राङ्जी। थेसे गोर निस मुकुट कूबा मुबा।* ⁴ थे अजिङ्गरला मेःसे मुला सारगदे भो सोम न्हडरी भो गिक सारदा पोप लसी जम्बुलिङरी भ्याङ्जी। ओच्छे कोला न्हमैछ्याम चतोःला भिसी थे अजिङ्गर कोला न्हबारी छ्याइबा थे म्रिडम्हेमेला डामरी राप्सी चिजी।* ⁵ थे म्रिडम्हेमेसे जम्बुलिङला जम्मान य्हुलला म्हिगदेदा फाइला कडीसे शासन लबा झा गिक न्हजी। थे कोलादा परमेश्वर मुबा ग्लारी थीसी भोर्सी परमेश्वरला ठिरी थान्जी।* ⁶ जमाहेन्से थे म्रिडम्हेमे तोडतोडबा ग्लारी यार्जी। थेला लागिरी हजार गिकसे ग्यार्जी न्हीसे बोगल सोम धिनधोनाला लागिरी चबा थुङ्बा लगै भिसी परमेश्वरसे थेदा ग्ला गिक ठीक लसी थान्बा मुबा।

⁷ ओच्छे स्वर्गरी लडाइ तजी। मिखाएलदेन[†] थेला दूतगदेसे थे अजिङ्गरदेन थेला दूतगदेदेन छ्याम लडाइ लजी। थेहङ् लसीन अजिङ्गरदेन थेला दूतगदेसेनोन लडाइ लजी।* ⁸ तर अजिङ्गरदेन थेला दूतगदे भ्रेजी। जमाहेन्से थेनीगदेदा चिबाला लागिरी स्वर्गरी ग्ला आतनी। ⁹ थे अजिङ्गर चा दडबोला पुख्री हिनना। थेला मिन शैतान हिनना, थेदा म्हडला ग्लेएनोन भिमुला। थेसे जम्बुलिङला जम्मान म्हिगदेदा न्होङ्ना लबा मुबा। थेदेन थेला दूतगदेदान स्वर्गग्याम जम्बुलिङरी भ्याङ्जी।* ¹⁰ जमाहेन्से डाइ स्वर्गरी घेन काइसे चुहङ् भिबा थेःजी,

“दाहेन्से य्हाडला परमेश्वरग्याम य्हाडसे याङ्बा थार्बादेन शक्ति

* 12:3 दानि ७:७ * 12:4 दानि ८:१० * 12:5 यशै ६६:७; भजन २:९ † 12:7 “मिखाएल” भिबा चा घेन स्वर्गदूत हिनना, थे चा स्यहान्दो स्वर्गदूतगदेला कपतान हिनना। * 12:7 दानि १०:१३, २१; १२:१; यहू ९ * 12:9 उत्प ३:१; लूका १०:१८

ओच्छे परमेश्वरला य्हुल्सादेन थेसे धम्बा थार्बा पिन्बा
स्त्रीष्टला अधिकार उन्बा मुला।

तिग्दा भिसम य्हाडला ज्योज्यो आले नाना आडागदेदा
धिन म्हूननोन परमेश्वरला डाच्छापट्टि दोष उन्बा
शैतानदा स्वर्गग्याम भ्याड्बा मुला।*

11 थार्बा पिन्बा ग्यु बोगोला कादेन थेनीगदेसे पाड्बा सत्य बचन
तबासे लमा
थेनीगदेसे थेदा ढाबा मुला।

ओच्छे हाडला ज्याननोन पिन्बारी थेनीगदे तयार तबा मुबा।

12 थेतबासेलमा एनीगदे स्वर्गदेन स्वर्गरी मुबागदे जम्मान ताड्गो!
तर जम्बुलिडदेन समुन्द्ररी मुबागदेदा गाते दुख तला!

तिग्दा भिसम शैतानसे हाड ल्हाना आसो भिबा ताम था याड्सी
थे ल्हानान बोमो खसी एनीगदे मुबा ग्लारी खबा मुला।”

13 थे अजिङ्गरसे हाडदा जम्बुलिडरी भ्याड्जी भिबा ताम था
याड्सी थे झा न्हबा म्रिडम्हेमेदा ताप्वारी छ्याड्जी। 14 तर थे
म्रिडम्हेमेदा तोडतोडबा ग्लारी फ्याड्सी निबाला लागिरी घेन
गवाइला भ्याप पिन्जी। थे तोडतोडबा ग्ला चा थे म्रिडम्हेमेदा
अजिङ्गरग्याम सोम दिडसे ला दुधोना† जोगब तसी चिबाला
लागिरीदेन चबा थुड्बा लबाला लागिरी ठीक लसी थान्बा मुबा।*

15 थे म्रिडम्हेमेदा भाल बाढीसे भोर्गे भिसी थे अजिङ्गरसे सुडग्याम
स्योड हड् लसी क्युड पुड्जी। 16 तर जम्बुलिडसे हाडला सुड
आँ लसी थे अजिङ्गरला सुडग्याम थोन्बा स्योड ग्लोड्सी थे
म्रिडम्हेमेदा जोगब लजी। 17 जमाहेन्से थे अजिङ्गर थे म्रिडम्हेमेदेन
छ्याम झन ल्हानान बोमो खजी। ओच्छे परमेश्वरसे कुल्बा ताम
ड्यानबादेन येशूसे लोप्बा तामथोरी विश्वास लबा थे म्रिडम्हेमेला

* 12:10 अय्यूब १:९-११; जक ३:१ † 12:14 ग्रीक बाइबल अन्छार सोम दिडसे
ला दुधोना भिबा चा धुड, धुडगदेदेन धुड गडसल भिसी भिबा मुला। * 12:14 दानि
७:२५; १२:७

अर्गु सन्तानगदेदेन छ्याम लडाइ लबारी भ्रजी। 18 ओच्छे थे अजिङ्गर समुन्द्रला कुनीरी निसी राप्जी।

13

समुन्द्रग्याम थोन्सी खबा जन्तु

1 जमाहेन्से डाइ लोड्बा खबा जन्तु गिक समुन्द्रग्याम थोन्सी खबा म्राङ्जी। थे जन्तुला गोर च्युइ रुदेन गोर निस थोबो मुबा, ओच्छे थेला जम्मान रुरी गोर गिक गिक मुकुट मुबा। थेहड् लसीन थेला जम्मान थोबोरी परमेश्वरदा बिरोध लबा आज्यबा मिन भ्रिबा मुबा। 2 थे लोड्बा खबा जन्तु चितुवा हड्बान मुबा। तर थेला काड तहुमला हड्बान मुबा ओच्छे सुड चा च्यान्ना हड्बान मुबा। थे अजिङ्गरसे हाडला शक्तिदेन हाडला ठि ओच्छे घेन अधिकार थे जन्तुदा पिन्जी।* 3 थे लोड्बा खबा जन्तुला थोबोगदे न्हडला थोबो गिकरी चा घेन पोर तबा हड्बान म्राङ्मुबा, थे पोरसे लमा थे सिबारी छ्याइबा मुबा, तर थे पोर खम्जी। जमाहेन्से जम्बुलिडला जम्मान म्हिगदे उदेक तसी थे जन्तुला लिच्छा लिच्छा भ्रजी। 4 थे अजिङ्गरसे हाडला अधिकार थे लोड्बा खबा जन्तुदा पिन्बा म्राङ्सी म्हिगदेसे थे अजिङ्गरदा तेन्जी। ओच्छे म्हिगदेसे “चु जन्तु हड्बा अर्गु खाल मुला? चुदेन छ्याम खाल छेबारी खम्ला?” भिबान थे जन्तुदाएनोन तेन्जी।

5 थे लोड्बा खबा जन्तुदा परमेश्वरला बिरोध लबा ताम पाङ्पुङ्जी। ओच्छे थेदा तिग लइ म्हन्बा थेनोन लबारी बोगल न्हीसे ला न्हीधोना अधिकार पिन्जी।* 6 थे लोड्बा खबा जन्तुसे परमेश्वरला बिरोधरी ताम पाङ्जी। परमेश्वरला मिनदेन थे धन्छ्याबा ग्ला ओच्छे स्वर्गरी परमेश्वरदेन छ्याम चिबागदेला बिरोध लजी। 7 थे लोड्बा खबा जन्तुदा परमेश्वरला म्हिगदेदेन

* 13:2 दानि ७:४-६

* 13:5 दानि ७:८, २५; ११:३६

लडाइ लसी ढाबारी खम्बा शक्ति पिन्बा मुबा। ओच्छे जम्मान वंशदेन म्हिगदे ओच्छे थरी थरीला ग्योइगदेदेन यहुलगदेथोरी शासन लबा अधिकार पिन्बा मुबा।* 8 जम्बुलिङ स्होबा भन्दा डाच्छान जुकजुकधोनाला जुनीला किताबरी मिन आरेबा जम्बुलिङला जम्मान म्हिगदेसे थे लोङ्बा खबा जन्तुदा तेन्ना। थे किताब चा साइबा थार्बा पिन्बा ग्यु बोगोला मुबा।*

9 जुन म्हिदा ड्यान्बा सेम मुला,
थेसे ड्यान्सी ज्यना लसी घोड।

10 खालै म्हिदा झ्याल्खानरी झाङ्तोःबा मुसम
थेदा झ्याल्खानरी झाङ्नोन झाङ्ला।

ओच्छे खालै म्हि तरवारग्याम सितोःबा मुसम
थे तरवारग्यामसेन सिला।

थेतबासेलमा परमेश्वरला म्हिगदेदेन छ्याम गाते नाखम्बा शक्तिदेन विश्वास ततोःला भिबा ताम चुग्यामसेन था तला।*

जम्बुलिङग्याम थोन्बा जन्तु

11 ओच्छे डाइ जम्बुलिङग्याम थोन्सी खबा अर्गु लोङ्बा खबा जन्तु गिकएनोन म्राङ्जी। थे लोङ्बा खबा जन्तुला ग्युला हड्बान रु न्ही मुबा। तर थेसे अजिङ्गरसे हड् लसी ताम पाङ्मुबा। 12 चु लोङ्बा खबा जन्तुसे समुन्द्रग्याम थोन्बा थे डाच्छाला लोङ्बा खबा जन्तुला लागिरी हाडला अधिकारग्याम जम्बुलिङला जम्मान म्हिगदेदा थे घेन पोर म्हाबा डाच्छाला लोङ्बा खबा जन्तुदा तेन्पुङ्जी। 13 जम्बुलिङग्याम थोन्बा थे लोङ्बा खबा जन्तुसे जम्मान महिला डाच्छा मुग्याम जम्बुलिङरी मे ताइना लसी घेन घेन चिनुगदे उन्जी। 14 थेसे थे समुन्द्रग्याम थोन्बा लोङ्बा खबा जन्तुला लागिरी उदेकला चिनुगदेग्याम

* 13:7 दानि ७:२१ * 13:8 भजन ६९:२९ * 13:10 यर्मि १५:२; ४३:११

जम्बुलिङला जम्मान म्हिगदेदा फसब लजी। ओच्छे तरवारसे थासी घेन पोर तसीनोन सोबा थे लोड्बा खबा जन्तुदा मान लबाला लागिरी थेला मूर्ति गिक स्होउ भिसी जम्बुलिङग्याम थोन्बा थे लोड्बा खबा जन्तुसे जम्मान म्हिगदेदा कुल्जी। 15 थे जम्बुलिङग्याम थोन्बा जन्तुदा थे डाच्छा थोन्बा जन्तुला मूर्तिसे ताम पाङ्खमगै ओच्छे थेला मूर्तिदा आतेन्बा म्हिगदेदा साङ्गै भिसी थे मूर्तिरी सा युबा अधिकार पिन्जी। 16 ओच्छे थे जम्बुलिङग्याम थोन्बा जन्तुसे जजा मुसै घेन मुसै, फ्युकपो मुसै प्राडबो मुसै, नोकर हिन्सै नोकर आहिन्सै जम्मादान हाड हाडला दाहिने यारी तसै डोरी तसै चिनु लपुङ्जी। 17 थे चिनु आलबा म्हिगदेसे चा तिगै सहे ग्लुबा चूड्बा लआम्याङ्मुबा। थे चिनु चा समुन्द्रग्याम थोन्बा जन्तुला मिन अथवा थेला मिनदा घोबा अङ्क हिन्ना।

18 चु ताम घोबाला लागिरी ज्ञान बुद्धि तोःला, जुन म्हिदेन घोखम्बा शक्ति मुला थेसे थे समुन्द्रग्याम थोन्बा जन्तुला अङ्कला अर्थ घोखमगै। तिग्दा भिसम थे अङ्क म्हि गिकला मिनग्याम थान्बा हिन्ना। थे अङ्क चा ६६६ हिन्ना।

14

थार्बा याड्बागदेसे गोबा व्हाड

1 दोःसी डाइ च्यामा सियोन गडरी थार्बा पिन्बा ग्यु बोगो राप्सी चिबा मुबा। थेदेन छ्याम लाख गिकसे बोगल न्हीसे हजार बलि म्हिगदे मुबा। थे म्हिगदेला डोरी थेदेन थेला आबाला मिन भिबा मुबा।* 2 ओच्छे डाइ स्वर्गग्याम छाँगारी क्युड ताड्बा हड्बादेन मु गुडुड्बा हड्बान आवाज थेःजी। थे आवाज चा ल्हानान वीणा भिबा बाजा हाप्मा थोन्बा आवाज हड्बान थेःमुबा। 3 थे लाख

* 14:1 इज ९:४; उन्बा ७:३

गिकसे बोगल न्हीसे हजार ब्लि म्हिगदे चा मुल ठिदेन गोर ब्लि छोनबो जन्तु ओच्छे गन्बागदेला डाच्छापट्टि राप्सी छार व्हाइ गिक गोजी। चु व्हाइ चा थेनीगदेसे जे था याड्बारी खम्मुबा। तिग्दा भिसम थेनीगदेदा जे सय फासी जम्बुलिङ्ग्याम तेःबा मुबा।
 4 थेनीगदे खालै म्रिङ्कोलागदेदेन छ्याम आब्रेल्बा कन्याकेटा दोसी चिबा मुबा। थेनीगदे थार्बा पिन्बा ग्यु बोगोसे कुल्बा अन्छार भ्रमुबा। जम्बुलिङ्गला म्हिगदे न्हड्ग्याम थेनीगदेदा जे सय फासी तेःबा मुबा ओच्छे परमेश्वरदेन थार्बा पिन्बा ग्यु बोगोला लागिरी जम्मान भन्दा डाच्छा फुल्बा भेटी थेनीगदेन मुबा।
 5 थेनीगदेसे लुसीला ताम तिगैनोन लबा आरेबा, ओच्छे थेनीगदे तिगै दोष आरेबा म्हि मुबा।*

गोर सोम स्वर्गदूत

6 जमाहेन्से डाइ मुरी फ्याड्बान लबा स्य्हान्दो स्वर्गदूत गिकदा म्राङ्जी। थे जम्बुलिङ्गरी मुबा जम्मान य्हुल्साला म्हिगदे, जम्मान वंशला म्हिगदेदेन थरी थरीला ग्योइ पाड्बा म्हिगदेदेन य्हुल य्हुलला म्हिगदेदा जुकजुकधोनाला जुनी पिन्बा समाचार थेःना लबारी खबा मुबा।
 7 थेसे घेन काइग्याम चुहङ् भिसी भिजी, “परमेश्वर म्राङ्सी लोङ्गो, ओच्छे थेदा मानदेन जयजयकार लउ। तिग्दा भिसम परमेश्वरसे जम्मान म्हि य्हुलला निसाफ लबा धुइ तसी जिन्बा मुला। थेतबासेलमा स्वर्गदेन जम्बुलिङ्ग ओच्छे समुन्द्रदेन क्युइला मुलगदे सहोबा परमेश्वरदा तेन्गो।”

8 ओच्छे स्य्हान्दो स्वर्गदूत गिकएनोन थेनोन स्वर्गदूतला लिच्छा लिच्छा चुहङ् भिबान खजी, “थे घेन बेबिलोन शहर नाश तबा मुला! हिन्ना नाश तबा मुला। थेनोन शहरसे जम्मान

* 14:5 सप ३:१३

य्हल य्हलला म्हिगदेदा स्य्हान्दोदेन छ्याम ब्रेल्पुड्सी निडगुसे ड्य्होइबा हड्नीन तना लजी।”*

9 थे स्वर्गदूत न्हीला लिच्छा लिच्छा स्य्हान्दो स्वर्गदूत गिकएनोन घेन काइरी चुहड् भिबान खजी, “चुदे खालै म्हिसे थे समुन्द्रग्याम थोन्बा जन्तुदेन थेला मूर्तिदा तेन्सी डोरी अथवा यारी थेला चिनु थान्जी भिसम, 10 थेदाएनोन परमेश्वरसे हाडला बोमोग्याम घेन सजाय पिन्ना, थेनीगदेदा परमेश्वरला स्वर्गदूतगदेदेन थार्बा पिन्बा ग्यु बोगोला डाच्छापट्टि मेदेन गन्धकरी भ्याड्सी सजाय पिन्ना।” 11 ओच्छे थेनीगदेदा सजाय पिन्बा मेला म्युगु सदन तोरपट्टि निला। जुन जुन म्हिसे थे समुन्द्रग्याम थोन्बा जन्तुदेन थेला मूर्तिदा तेन्सी थेला मिन मुबा चिनु थान्ना थेनीगदेसे धिन म्हुननोन सजाय नातोःला।”* 12 परमेश्वरसे कुल्बा ताम ड्यानबादेन येशूदा विश्वास लबा परमेश्वरला म्हिगदे चा खाहड् लसी नासी विश्वास आख्लाना चितोःला भिबा ताम चुग्यामसेन था तला।

13 ओच्छे डाइ स्वर्गग्याम चुहड् भिबा काइ थेःजी, “चु भ्रिसी थान्गो, दाहेन्से प्रभुदा विश्वास लसी सिबागदे परमेश्वरग्याम मोलम याड्बागदे हिन्ना।” परमेश्वरला आत्मासे चुहड् भिसी सुड्बा मुला, “हिन्ना, थेनीगदे हाड हाडसे लबा गेदेन दुखग्याम फेबा मुला ओच्छे थेनीगदेसे लबा गे अन्छारला इनाम याड्ला।

जम्बुलिडला बाली खन्बा धुइ

14 ओच्छे डाइ परमेश्वरसे पुइखबा म्हि हड्बान म्हि गिक तार खसुथोरी धन्छ्याबा म्राड्जी। थेसे म्हरला मुकुट कूबा मुबा। थेला यारी छ्यार्बा हड्सु गिक मुबा।” 15 जमाहेन्से परमेश्वरला मन्दिर न्हड्ग्याम स्य्हान्दो स्वर्गदूत गिक खसी खसुरी धन्छ्याबादा

* 14:8 यशै २१:९; यर्मि ५१:८; उन्बा १८:२ * 14:10 यशै ५१:१७; उत्प १९:२४;

इज ३८:२२ * 14:11 यशै ३४:१० * 14:14 दानि ७:१३

घेन काइसे चुहङ् भिसी भिजी, “हाडला हडसुसे बाली खन्गो। तिग्दा भिसम जम्बुलिडला जम्मान बाली खन्बा धुइ तसी जिन्बा मुला।”* 16 जमाहेन्से खसुथोरी धन्छ्याबासे जम्बुलिडथोरी हाडला हडसु चलब लसी जम्बुलिडला जम्मान बाली खन्जी।

17 थेहङ् लसीन स्वर्गरी मुबा परमेश्वरला मन्दिर न्हङ्ग्याम स्य्हान्दो स्वर्गदूत गिकएनोन मङ्ग्यार खजी। थेदेन छ्यामएनोन छ्यार्बा हडसु गिक मुबा। 18 जमाहेन्से मेथोरी अधिकार मुबा स्य्हान्दो स्वर्गदूत गिक धूप म्बाबा ग्लाग्याम थोन्जी। ओच्छे हडसु थोबा स्वर्गदूतला छ्यार्बा हडसुसे जम्बुलिडला अङ्गुर थुउ,† तिग्दा भिसम जम्बुलिडला अङ्गुर मिन्सी जिन्बा मुला” भिसी घेन काइसे पाङ्जी। 19 जमाहेन्से थे स्वर्गदूतसे जम्बुलिडथोरी हाडला हडसु चलब लसी जम्बुलिडला जम्मान अङ्गुर थुसी ग्ला गिकरी पोप लजी। ओच्छे थे अङ्गुरदा परमेश्वरसे सजाय पिन्बा कोलरी भ्याङ्जी। 20 थे अङ्गुरदा शहरला मङ्ग्यारपट्टि मुबा कोलरी म्हर्जी। थे कोलग्याम ओस्पन मिटर नाङ्से गङ्गसल नुप्बा† ओच्छे ग्यार्जा सोम किलोमिटर हेङ्बा काला स्योड थोन्बा मुबा।*

15

गोर निस स्वर्गदूतगदे

1 डाइ स्वर्गरी उदेकला घेन अर्गु चिनु गिक म्बाङ्जी। थेरी आपत विपत गिक गिक थोसी चिबा गोर निस स्वर्गदूतगदे मुबा। चु चा जम्मान भन्दा लिच्छाला आपत विपत मुबा। तिग्दा भिसम परमेश्वरसे पिन्बा जम्मान भन्दा लिच्छाला सजाय चुनोन मुबा।

* 14:15 योए ३:१३ † 14:18 चु पदरी “अङ्गुर” भिबा चा परमेश्वरदा विश्वास आलबा म्हिगदे हिन्ना। † 14:20 मिटर नाङ्से गङ्गसल नुप्बा भिबा चा ग्रीक बाइबल अन्छार सहेन्से दप्मा ताला सुडधोना दोमुबा। * 14:20 यशै ६३:३; विल १:१५; उन्बा १९:१५

2 डाइ डाला डाच्छापट्टि मेदेन सिसा दोड्बा समुन्द्र हड्बान सहे
म्राड्जी। ओच्छे समुन्द्रग्याम थोन्बा जन्तुदेन थेला मूर्ति ओच्छे
थेला मिनग्याम थान्बा अङ्कथोरी ढाबागदे जम्मादान म्राड्जी।
थेनीगदे ह्राड ह्राडला यारी परमेश्वरसे पिन्बा वीणा थोसी थे
समुन्द्रला कुनीरी राप्सी चिबा मुबा। 3 थेनीगदेसे चुहड् भिसी
परमेश्वरदा तेन्बा म्हि मोशादेन

थार्बा पिन्बा ग्यु बोगोला व्हाइ गोबान मुबा,
“परमप्रभु परमेश्वर ह्राड जम्मान भन्दा घेन हिन्ना,
ह्राडला गे ल्हानान घेनदेन उदेकला मुला,
ओच्छे जम्बुलिडला जम्मान यहुलला म्हिगदेथोरी
सदन शासन लबा ग्ले ह्राडनोन हिन्ना,
ह्राडसे लबा गेगदे सत्यदेन ठीक मुला।*
4 परमप्रभु ह्राड म्राड्सी आलोड्बा म्हि खाल मुला?
ओच्छे ह्राडदा मान लसी जयजयकार आलबा म्हि खाल मुला?
तिग्दा भिसम ह्राड जे जम्मान भन्दा चोखो मुला।
जम्मान यहुलला म्हिगदेसे ह्राडदा तेन्ना,
तिग्दा भिसम ह्राडसे ठीक निसाफ लबा जम्मासेन म्राड्बा मुला।”*

5 जमाहेन्से डाइ स्वर्गरी परमेश्वरला मन्दिर ठोड्बा म्राड्जी,
ओच्छे मन्दिर न्हडला जम्मान भन्दा चोखो ग्लाएनोन म्राड्जी।*

6 थे मन्दिर न्हडग्याम गोर गिक गिक आपत विपत थोबा गोर
निस स्वर्गदूतगदे थोन्सी खजी। थेनीगदेसे सफादेन य्हाल य्हाल्बा
क्वान क्वान्बा मुबा, ओच्छे कुरी म्हरला फित्ता खीबा मुबा।
7 जमाहेन्से थे गोर ब्लि छोन्बो जन्तुगदे न्हडला गिकसे थे गोर
निस स्वर्गदूतगदेदा सदन सोबा परमेश्वरला बोमोसे प्लिड्बा गोर
गिक गिक म्हरला खोरे पिन्जी। 8 ओच्छे परमेश्वरला य्हालदेन

* 15:3 प्रसथा १५:१

* 15:4 यर्मि १०:७; भजन ८६:९

* 15:5 प्रसथा ३८:२१

शक्तिग्याम थोन्बा म्युगुसे मन्दिर प्लिङ्जी। जमाहेन्से थे गोर निस स्वर्गदूतगदेसे थोबा गोर निस आपत विपत आजिन्तेधोना खालैनोन मन्दिर न्हडरी वाङ्बारी आखम्नी।*

16

परमेश्वरला बोमोसे प्लिङ्बा गोर निस खोरे

1 जमाहेन्से डाइ परमेश्वरला मन्दिर न्हडग्याम घेन काइरी थे गोर निस स्वर्गदूतगदेदा चुहङ् भिसी कुल्बा थे:जी, “एनीगदे निउ, ओच्छे परमेश्वरला बोमोसे प्लिङ्बा थे गोर निस खोरे जम्बुलिङ्थोरी ल्हूगो।”

2 जमाहेन्से स्वर्गदूत गिक निसी हाडदेन छ्याम मुबा खोरे जम्बुलिङ्थोरी ल्हूजी। थेतबासेलमा थे समुन्द्रग्याम थोन्बा जन्तुला चिनु थान्बादेन थेला मूर्तिदा तेन्बा म्हिगदेदा ल्हानान सहु खबादेन नइबा खबा पोर थोन्जी।*

3 ओच्छे न्हीरेमला स्वर्गदूतसे हाडदेन छ्याम मुबा खोरे समुन्द्ररी ल्हूजी। ओच्छे समुन्द्रला क्युइ सिबा महिला का हङ्बान दोजी। थेतबासेलमा समुन्द्ररी मुबा जम्मान छोन्बो जन्तुगदे सिजी।

4 ओच्छे सोमरेमला स्वर्गदूतसे हाडदेन छ्याम मुबा खोरे स्योडदेन क्युइला मुहानरी ल्हूजी। जमाहेन्से जम्मान क्युइ का दोजी।* 5 जमाहेन्से डाइ क्युइला अधिकार याङ्बा स्वर्गदूतसे चुहङ् भिबान लबा थे:जी, “हाड तिगै दोष आरेबा परमेश्वर हिन्ना, हाड डाच्छाएनोन मुबा, दान्देनोन मुला। हाडसे लबा निसाफ ठीक मुला। 6 हाडसे पुइखबा अगमवक्तागदेदेन हाडदा तेन्बा म्हिगदेदा थेनीगदेसे साइबासे लमा हाडसे थेनीगदेदा कानोन थुङ्पुङ्सी

* 15:8 प्रस्था ४०:३४; १ राजा ८:१-११; २ इति ५:१३-१४; यशै ६:४ * 16:2 प्रस्था ९:१० * 16:4 प्रस्था ७:१७-२१; भजन ७८:४४

थेनीगदेसे याड्तोःबा सजाय पिन्बा मुला।” 7 जमाहेन्से डाइ धूप म्बाबा ग्लाग्याम चुहड् भिबा थेःजी, “परमप्रभु परमेश्वर, हाड जम्मान भन्दा घेन परमेश्वर हिन्ना, हाडसे लबा निसाफ सत्यदेन ठीक मुला।”

8 जमाहेन्से ब्लिरेमला स्वर्गदूतसे हाडदेन छ्याम मुबा खोरे धिनीरी ल्हूजी। ओच्छे धिनीग्याम थोन्बा मेला हड्बा रापसे म्हिगदेदा क्रोना लपुड्जी। 9 मेला हड्बा धिनीला रापसे म्हिगदे क्रोजी, ओच्छे थे आपत विपतगदेदा तहरी थान्बा परमेश्वरदा म्हिगदेसे केःजी। तर थेनीगदे हाड हाडला पाप ख्लासी परमेश्वरपट्टि दोःसी परमेश्वरदा मानदेन जयजयकार आलनी।

10 डारेमला स्वर्गदूतसे हाडदेन छ्याम मुबा खोरे थे समुन्द्रग्याम थोन्बा जन्तुला† ठिथोरी ल्हूजी। ओच्छे थेला यहुल्सा धोपधोप तजी। जमाहेन्से थेनीगदेसे सहु सहेरसे लमा स्वा क्रेजी।* 11 थेनीगदेदा तबा सहु सहेरदेन पोरसे लमा थेनीगदेसे स्वर्गरी धन्छ्याबा परमेश्वरदा बिरोध लजी। तर थेनीगदे हाड हाडसे लबा आज्यबा गे ख्लासी परमेश्वरपट्टि आदोःनी।

12 दुरेमला स्वर्गदूतसे हाडदेन छ्याम मुबा खोरे यूफ्रेटिस भिबा घेन स्योडरी ल्हूजी। जमाहेन्से स्यारग्याम खबा ग्लेगदेदेन थेला सिपाहीगदेदा भ्रबारी ग्याम तगै भिसी थे स्योड खर्जी।* 13 जमाहेन्से डाइ अजिङ्गरदेन थे जम्बुलिङ्ग्याम थोन्बा जन्तु ओच्छे लुसीला ताम पाड्बा अगमवक्ताला सुङ्ग्याम भाल्बा हड्बान गोर सोम म्हड्गदे थोन्बा म्बाड्जी। 14 थे आज्यबा आत्मागदे चा उदेकला चिनुगदे उन्बा म्हड्गदे हिन्ना। जम्मान भन्दा घेन परमेश्वरसे निसाफ लबा धिनकुनु थे आत्मागदे

† 16:10 थे समुन्द्रग्याम थोन्बा जन्तु चा शैतानना ग्ले हिन्ना। * 16:10 प्रस्था १०:२१ * 16:12 यशै ११:१५

परमेश्वरदेन छ्याम लडाइ लबाला लागिरी जम्बुलिडला जम्मान ग्लेगदेदा पोप लबारी निला।

15 “च्यागो, डा यहो खबा हड् लसी खालैदा था आयाङ्ना लसी खला। जुन म्हि छोर्सी चिसी हाडला क्वान हाडदेन छ्याम थान्ना थे परमेश्वरग्याम मोलम याङ्बा म्हि हिनना। थेहड् लसी हाडला क्वान जोगब लसी थान्बा म्हि लिगन्डी भ्रआतोः। ओच्छे म्हिगदेला डाच्छापट्टि पेःआतोः।”† 16 ओच्छे थे म्हडगदेसे जम्बुलिडला जम्मान ग्लेगदेदा ग्ला गिकरी पोप लजी। थे ग्लादा हिब्रू ग्योडरी आर-मागेड्डोन भिमुबा।*

17 ओच्छे निसरेमला स्वर्गदूतसे हाडदेन छ्याम मुबा खोरे लाबाथोरी ल्हूजी। जमाहेन्से मन्दिरला ठिग्याम “दाहेन्से जिन्जी” भिबा घेन काइ खजी। 18 जमाहेन्से तिप्लीड खबादेन मु ठेङ्बा ओच्छे घेन घेन काइ खजी, ओच्छे घेन सडगुल खजी। थेहड्बा घेन सडगुल मी जम्बुलिडरी म्हि टुङ्बा धिनहेन्से दान्दधोना खाइमै खबा आरेबा। 19 जमाहेन्से थे घेन बेबिलोन भिबा शहर भो सोम तसी फेजी, ओच्छे जम्मान यहुल्साला शहरगदे नाश तजी। परमेश्वरसे थे घेन शहर बेबिलोनला पाप ढन्जी, ओच्छे हाडला घेन बोमोग्याम थे शहरदा सजाय पिन्जी।* 20 जमाहेन्से समुन्द्रला गुडरी मुबा जम्मान ग्लागदेदेन जम्मान गडगदे म्हाजी। 21 ओच्छे मुग्याम म्हिगदेथोरी ओस्पन बोगल न्ही किलोला सेर्बा ताइबारी छ्याइजी। चुहड्बा सेर्बा ताइसी आपत विपत तबासे लमा म्हिगदेसे परमेश्वरदा केःबारी छ्याइजी। तिग्दा भिसम चु ल्हानान लौङ्बा खबा आपत विपत मुबा।

† 16:15 चु पदला ताम प्रभु येशूसे सुङ्बा हिनना, (मत्ती २४:४३-४४; लूका १२:३९-४०; उन्बा ३:३ सहीगो)। † 16:16 “आर-मागेड्डोन” भिबा चा मेगोड्डो भिबा गड हिनना। ओन्मा थे गडरी ल्हानान लडाइ तबा मुबा। * 16:16 २ राजा २३:२९; न्याय ५:१९; जक १२:११ * 16:19 यशै ५१:१७

17

ल्हानान बेश्या गे लसी भ्रबा भ्रिडम्हेमे

1 थे गोर निस खोरे थोबा गोर निस स्वर्गदूतगदे न्हडला गिक डा मुबा ग्लारी खसी डादा चुहड् भिजी, “चुरी खउ, डाइ एदा ल्हानान स्योडगदेला कुनीरी चिबा जम्मासेन डोसेबा बेश्या भ्रिडम्हेमेसे याड्बा सजाय उन्ना। थे बेश्या भ्रिडम्हेमे ल्हानान स्योडगदेला कुनीरी मुबा घेन बेबिलोन शहर हिनना।* 2 जम्बुलिडला ग्लेगदे थे बेश्या भ्रिडम्हेमेदेन छ्याम ब्रेल्बा मुला। ओच्छे जम्बुलिडला म्हिगदे थेदेन छ्याम ब्रेल्सी अडगुरला निडगुसे ड्य्होइबा हड्णोन तबा मुला।*

3 जमाहेन्से डा परमेश्वरला आत्मासे प्लिड्जी। ओच्छे थे आत्मारी स्वर्गदूतसे डादा तोडतोडबा ग्लारी भोर्जी। थेरी डाइ वाला जन्तुथोरी† क्रेःबा भ्रिडम्हेमे गिक म्राड्जी। थे जन्तुला गोर निस थोबा मुबा ओच्छे गोर च्युइ रु मुबा। थे जन्तुला जिउ नाड्णोन परमेश्वरदा बिरोध लबा मिनगदे भ्रिबा मुबा।* 4 थे भ्रिडम्हेमेसे चा वाला वाला पिडगैदेन वाला क्वान क्वान्बा मुबा। ओच्छे म्हर, रत्नदेन मोतीगदे क्वान्सी ज्योबा मुबा। थेसे हाडला यारी म्हरला खोरे गिक थोबा मुबा। थे खोरे चा थेसे लबा नइबा तामदेन थे स्य्हान्दोदेन छ्याम ब्रेल्सी भ्रबा नइबा खबा तामगदेसे प्लिड्बा मुबा।* 5 थे भ्रिडम्हेमेला डोरी, “जम्बुलिडला बेश्यागदेदेन नइबा खबा तामगदेला आमा घेन बेबिलोन शहर” भिसी म्हिसे था आयाड्बा मिन गिक भ्रिबा मुबा। 6 ओच्छे डाइ थे भ्रिडम्हेमे परमेश्वरला म्हिगदेदेन येशूला लागिरी हाडला ज्याननोन पिन्बा म्हिगदेला का थुड्सी ड्य्होइबा म्राड्जी।

* 17:1 यर्मि ५१:१३ * 17:2 यशै २३:१७; यर्मि ५१:७ † 17:3 वाला जन्तुदेन समुन्द्रग्याम थोन्बा लोड्बा खबा जन्तु ओस्पन तखम्ला। उन्बा १३:१ सूहीगो।

* 17:3 उन्बा १३:१ * 17:4 यर्मि ५१:७

थे म्रिडम्हेमेदा म्राङ्सी डा ल्हानान उदेक तजी। 7 जमाहेन्से थे स्वर्गदूतसे डादा चुहङ् भिजी, “ए तिग्दा उदेक म्हन्बा? थे म्रिडम्हेमेदेन थेदा पुड्बा गोर निस थोबादेन गोर च्युइ रु मुबा जन्तुला बारेरी म्हिसे था आयाङ्बा ताम डाइ एदा पाङ्ला। 8 एसे म्राङ्बा थे जन्तु डाच्छा मुबा, तर दान्दे आरे। सदनना लागिरी नाश तबारी थे ल्हानान नुप्बा व्हाङ्ग्याम तोर खबारी छ्याइबा मुला। जम्बुलिङ् छ्यामाहेन्से जुकजुकधोनाला जुनीला किताबरी मिन आभिबा जम्बुलिङ्ला म्हिगदे थे जन्तुदा म्राङ्सी उदेक म्हन्ना। तिग्दा भिसम थे जन्तु डाच्छा मुबा, दान्दे सिसी जिन्बा मुला। तर थे दोःसी सोला।* ”

9 “चु ताम घोबारी ज्ञान बुद्धि तोःला। थे जन्तुला गोर निस थोबो चा थे म्रिडम्हेमे चिबा गङ् निस हिन्ना। 10 थे गोर निस ग्लेगदेएनोन हिन्ना, थेनीगदे न्हङ्री गोर डा ग्लेगदे नाश तसी जिन्जी, गिक चा दान्देधोना शासन लबान मुला। ओच्छे स्य्हान्दो गिक चा अङ्ग खबा आरे। थे खमाहेन्से ला न्ही सोमला लागिरी जे थेसे शासन लला। 11 थे जन्तु डाच्छा सोबान मुबा, तर दान्दे सिसी जिन्बा मुला। थे जन्तु चा भ्रेःरेमला ग्ले हिन्ना। थे जन्तुएनोन गोर निस ग्लेगदे न्हङ्ला ग्ले गिक हिन्ना। तसैनोन थे नाश तला।

12 “एसे म्राङ्बा थे गोर च्युइ रु चा ग्ले च्युइ हिन्ना। तर थेनीगदेसे दान्देधोना शासन लम्याङ्बा आरे। थेनीगदेसे थे जन्तुदेन छ्याम तिगै धिनना लागिरी शासन लम्याङ्गला।* 13 थे ग्लेगदेला सेम गिकनोन मुला। थेतबासेलमा थेनीगदेसे हाङ् हाङ्ला शक्तिदेन अधिकार थे जन्तुदा जिम्मा पिन्ना। 14 थेनीगदेसे थार्बा पिन्बा ग्यु बोगोला बिरोध लसी लडाइ लला। तर थार्बा पिन्बा ग्यु बोगोसे थेनीगदेथोरी ढाला। तिग्दा भिसम थे प्रभुगदेला प्रभु

* 17:8 दानि ७:७; उन्बा ११:७; भजन ६९:२८ * 17:12 दानि ७:२४

ओच्छे ग्लेगदेलाएनोन ग्ले हिनना। थेदेन छ्याम मुबागदे चा थेसे ड्योइबागदेदेन धम्बागदे ओच्छे थेदा विश्वास लबागदे हिनना।”

15 थे स्वर्गदूतसे डादा दोःसी चुहड् भिसी पाड्जी, “एसे म्राड्बा थे बेश्या चिबा स्योडगदे चा य्हुल य्हुलदेन य्हुल्सा ओच्छे थरी थरीला ग्योइ पाड्बा म्हिगदे हिनना। 16 एसे म्राड्बा गोर च्युइ रुदेन थे वाला जन्तुसे थे बेश्यादा हेला लला। ओच्छे थेदेन छ्याम मुबा जम्मान सहे ब्यन्सी थेदा लिगन्डीन लसी थेला स्या चला। ओच्छे थेला नखुगदे मेसे ख्राड्सी नाश लला। 17 तिग्दा भिसम थेनीगदेदा परमेश्वरसे हाडसे म्हन्बा अन्छार पूरा लबा सेम पिन्बा मुबा। थेतबासेलमा परमेश्वरसे सुड्बा बचन पूरा आततेधोना थेनीगदे सेम गिकलान तसी हाडसे शासन लबा शक्तिदेन अधिकार थे लोड्बा खबा जन्तुदा पिन्जी। 18 एसे म्राड्बा थे म्रिड्महेमे चा जम्बुलिडला ग्लेगदेथोरी शासन लबा घेन शहर हिनना।”

18

बेबिलोन शहर नाश तबा

1 जमाहेन्से डाइ स्यहान्दो स्वर्गदूत गिक स्वर्गग्याम मार फापबान लबा म्राड्जी। थेदेन छ्याम घेन अधिकार मुबा। ओच्छे थेला य्हालदेन शक्तिसे लमा जम्बुलिड नाडनोन य्हाल य्हाल तजी। 2 थे स्वर्गदूतसे घेन काइरी चुहड् भिसी भिजी,

“थे शहर नाश तजी! थे घेन शहर बेबिलोन नाश तजी,

थे घेन शहर शैतानदेन थेला दूतगदे चिबा दिम दोबा मुला,

ओच्छे जम्मान नइबा आत्मागदेदेन चरागदे चिबा ग्ला दोजी।*

3 तिग्दा भिसम स्यहान्दोदेन छ्याम ब्रेल्सी भ्रबा थेला आज्यबा गेसे लमा

* 18:2 यशै १३:२१; २१:९; यर्मि ५०:३९; ५१:८; उन्बा १४:८

जम्मान यूहलला म्हिगदे अडगुरला निडगुसे ड्यूहोइबा
हडूनोन तबा मुला।

ओच्छे जम्बुलिडला ग्लेगदे थेदेन छ्याम ब्रेल्बा मुला,
थेला थेहड्बा ब्रेल्सी भ्रबा सेमसे लमा जम्बुलिडला
व्यापारीगदे फ्युकपो दोबा मुला।”*

4 जमाहेनसे डाइ स्वर्गग्याम चुहड् भिबान लबा अर्गु काइ थे:जी,
“डाला म्हिगदे, एनीगदे थे ग्लाग्याम थोन्सी खउ।

आहिन्सम थेसे लबा पापरी एनीगदेएनोन परब तला,
ओच्छे थेसे याड्बा सजाय एनीगदेसेनोन नातो:ला।*

5 तिग्दा भिसम थेसे पापथोरी पाप लबासे लमा थेला नड्बा गेगदे
स्वर्गधोनान धोबा मुला।

ओच्छे परमेश्वरसे थेसे लबा आज्यबा गेगदे ढन्बा मुला।*

6 थेसे एनीगदेदा तिग लबा मुला, थेदाएनोन एनीगदेसे थेहडूनोन
लउ।

ओच्छे थेसे जुन गे लबा मुला एनीगदेसे थेदा थे भन्दा दोब्बर नाड
फागो।

थेसे एनीगदेला लागिरी जुन सहे दोड्सी खोरेरी ठीक लबा मुबा
थे भन्दा लहाना खरो सहे एनीगदेसे थेदा पिन्गो।*

7 थेसे मोजमजा लसी जति मान याड्बा मुला,
ओतेन थेदा दुखदेन सुर्दा पिन्गो।

तिग्दा भिसम थेसे घमण्ड लसी सेम न्हड न्हडरी चुहड् भिसी
पाड्मुला।

‘डा ग्लेस्या दोसी चिबा मुला,
डा हेम्बो सिबा मिडम्हेमे आहिन।

थेतबासेलमा डाइ खाइमै सुर्दा लआतो:।”*

8 थेतबासेलमा तिरेरीन थेथोरी

* 18:3 यशै २३:१७; यर्मि ५१:७

* 18:4 यशै ४८:२०; यर्मि ५०:८; ५१:६, ४५

* 18:5 उत्प १८:२०-२१; यर्मि ५१:९

* 18:6 भजन १३७:८; यर्मि ५०:२९ * 18:7

यशै ४७:७-९

कालदेन सुर्दा ओच्छे रोगदेन अनिकाल खला।
 ओच्छे थेदा मेसे खाड्ला,
 तिग्दा भिसम थेला निसाफ लबा परमप्रभु परमेश्वर
 शक्तिशाली मुला।”

9 थेदेन छ्याम ब्रेल्बादेन मोजमजा लसी चिबा जम्बुलिडला
 ग्लेगदे थेदा क्रोबा मेला म्युगु म्राड्सी क्राबा क्रिड्बा लला। 10 थेदा
 पिन्बा सजाय नाआतोःगै भिसी थेनीगदे लोड्सी थारेडनोन राप्सी
 चुहड् भिजी,
 “अम्मै गाते आज्यबा ताम,
 परमेश्वरग्याम सजाय याड्बा घेन शक्तिशाली बेबिलोन शहर,
 एसे लबा आज्यबा गेसे लमा ए छिन्नडरीन नाश तबा मुला।”*

11 जम्बुलिडला व्यापारीगदे थेला लागिरी क्राबा क्रिड्बा
 लला, तिग्दा भिसम थेनीगदेसे लबा व्यापारला सामानगदे दोःसी
 खालैसेन आग्लु। 12 म्हर, म्हुइ, रत्न, मोतीदेन मलमलला
 क्वानगदे वाला वाला पिडगै छोनना क्वानगदे, रेशमला क्वानगदे,
 वाला क्वानगदे, जम्मान खाल्ला बास्ना खबा सिड, हात्तीला
 स्वाग्याम सहोबा जम्मान सहेगदे, ल्हानान महंगो जम्मान सिड,
 काँसग्याम सहोबा सहेगदे, फाइग्याम सहोबा सहेगदे, ओच्छे
 सिड्गमरमरग्याम सहोबा सहेगदे, 13 सिडकाउली, मसला, बास्ना
 खबा धूप, मूर्, तार धूप, अडगुरला निडगु, छ्युगु, ब्रा, ग्वा, म्हे, मुइ,
 ग्युगदे, तागदे, रथगदे, नोकरगदेदेन लडाइरी भ्रेबा म्हिगदेदाएनोन
 खालैसेन आग्लु।*

14 थे व्यापारीगदेसे थेदा चुहड् भिसी भिजी, “बेबिलोन, एला
 सेमसे म्हनबा जम्मान सहेगदे एग्याम ब्यन्बा मुला। ओच्छे एला
 धन सम्पत्तिदेन जम्मान झक्झक्बा सहेगदे नाश तसी जिन्बा
 मुला। दोःसी एसे थे जम्मान सहे खाइमै आयाड्। 15 थे घेन शहररी

* 18:10 इज २६:१६-१७

* 18:13 इज २७:१२, १३, २२

व्यापार लसी धनी तबा व्यापारीगदे थेदा पिन्बा घेन सजाय म्राड्सी लोड्सी थारेडनोन राप्सी चिला। ओच्छे चुहड् भिबान क्राबा क्रिड्बा लला,*

16 “अम्मै गाते आज्यबा ताम,

मलमलला क्वान, वाला वाला पिड्गैदेन वाला क्वान क्वान्बा ओच्छे म्हरदेन रत्न ओच्छे मोतीगदे क्वान्सी ज्योबा मुबा।

17 तिग्दा भिसम छिन्नडरीन एला जम्मान धन सम्पत्ति नाश तबा मुला।”

जम्मान पानी जहाजला कप्तानदेन पानी जहाजरी भ्रबा म्हिगदे ओच्छे पानी जहाज चलब लबा म्हिगदेदेन समुन्द्रग्याम व्यापार लबा म्हिगदे थारेडनोन राप्सी चिजी।* 18 ओच्छे थे घेन शहर क्रोसी थोन्बा म्युगु म्राड्सी, “चुहड्बा घेन शहर हड्बा अर्गु खजिबै शहर आरेबा” भिसी क्रिड्जी। 19 थेनीगदेसे हाड हाडला थोबोरी धुलु युसी चुहड् भिबान क्रिड्जी,

“अम्मै गाते आज्यबा ताम,

थेरी मुबा धन सम्पत्तिग्याम पानी जहाजला धनीगदे फ्युक्पो दोबा मुबा।

तर थे शहर छिन्नडरीन क्रोसी नाश तजी।*

20 स्वर्गरी मुबागदे, थे नाश तबासे लमा एनीगदे ताड्गो!

परमेश्वरला म्हिगदे, मुल चेलागदेदेन अगमवक्तागदे,

एनीगदे जम्मान ताड्गो।

तिग्दा भिसम थेसे एनीगदेदा अन्याय लबासे लमा

परमेश्वरसे थेदा सजाय पिन्बा मुला।”*

21 जमाहेनसे शक्तिशाली स्वर्गदूत गिकसे हान्दा हड्बान घेन युड्बा गिक थीसी चुहड् भिबान थे युड्बा समुन्द्री भ्याड्जी, “थे घेन शहर बेबिलोनदाएनोन चुहड् लसीन भ्याड्ला,

* 18:15 इज २७:३१, ३६ * 18:17 इज २७:२६-३० * 18:19 इज २७:३०-३४

* 18:20 व्यव ३२:४३; यर्मि ५१:४८

- ओच्छे थेदा दोःसी खाइमै आम्राड्।*
- 22 थेरी वीणादेन बाँसुरी ओच्छे बिगुलदेन
व्हाइ गोबागदेला काइ थेःआम्याड्।
थेरी जम्मान खाल्ला बुट्टा सहेड्बा म्हिगदेएनोन खाइमै आस्याप।
ओच्छे थेरी हान्दा ड्यबाएनोन खाइमै थेःआम्याड्।*
- 23 थेरी खाइमै नाडसल आम्रा।
ओच्छे थेरी महाछारदेन चाडछारला काइएनोन खाइमै
थेःआम्याड्।
तिग्दा भिसम एला व्यापारीगदे जम्बुलिडला घेन घेन म्हिगदे
मुबा।
ओच्छे एला तन्त्रमन्त्रसे यहुल यहुलला म्हिगदेदा ठगब लबा
मुबा।*
- 24 थे शहररीन अगमवक्तागदे, परमेश्वरला म्हिगदेदेन
जम्बुलिडरी साइबा जम्मान म्हिगदेला का स्याप्बा मुबा।”*

19

स्वर्गरी परमेश्वरला जयजयकार लबा

- 1 जमाहेन्से डाइ स्वर्गरी ल्हानान म्हिगदेसे घेन काइरी चुहड्
भिसी क्रिड्बा थेःजी,
“परमेश्वरदा जयजयकार तगै!
थार्बा पिन्बादेन मान ओच्छे शक्ति यह्हाडला परमेश्वरलान हिन्ना।
2 तिग्दा भिसम परमेश्वरसे लबा निसाफ सत्यदेन ठीक मुला।
स्य्हान्दोदेन छ्याम ब्रेल्सी जम्बुलिड नाडलान म्हिगदेदा न्होड्ना
लबा थे घेन बेश्यादा परमेश्वरसे निसाफ लबा मुला।

* 18:21 यर्मि ५१:६३-६४; इज २६:२१ * 18:22 इज २६:१३; यशै २४:८ * 18:23
यर्मि ७:३४; २५:१० * 18:24 यर्मि ५१:४९

ओच्छे हाडला गे लबागदेदा साइबासे लमा परमेश्वरसे थेदा
सजाय पिन्जी।”*

3 थेनीगदेसे दोःसी घेन काइरी चुहड् भिजी,

“परमेश्वरदा जयजयकार तगै!

थे घेन शहर क्रोसी थोन्बा म्युगु सदन तोरपट्टि निला।”*

4 ओच्छे थे बोगल गिकसे बलि गन्बागदेदेन थे गोर बलि छोन्बो
जन्तुगदेसे ठिरी धन्छ्याबा परमेश्वरदा फ्या लबान जयजयकार
लजी। ओच्छे थेनीगदेसे क्रिड्बान चुहड् भिजी।

“आमेन!, परमेश्वरदा जयजयकार तगै!”

5 ठिग्याम घेन काइरी चुहड् भिबा थेःजी,

“परमेश्वरला गे लबादेन थे म्नाड्सी लोड्बागदे जजा घेन जम्मासेन
य्हाडला परमेश्वरला जयजयकार लउ।”*

6 जमाहेन्से डाइ म्हिला घेन हुलला काइदेन छाँगाग्याम ताड्बा
क्युइला आवाज ओच्छे घेन मु गुडुड्बा हड्बान आवाजरी चुहड्
भिबा थेःजी,

“परमेश्वरदा जयजयकार तगै!

तिग्दा भिसम जम्मान भन्दा घेन परमप्रभु य्हाडला परमेश्वरसे
शासन लबा मुला।*

7 य्हाड ल्हानान ताड्सी परमेश्वरला मानदेन जयजयकार लइ!

तिग्दा भिसम य्हाडदा थार्बा पिन्बा ग्यु बोगोला ब्याह लबा धिन
खसी जिन्बा मुला।

ओच्छे थेला चाड्छारएनोन ठीक तसी जिन्बा मुला।

8 चाड्छारदा मलमलला य्हाल य्हाल्बा सफा क्वान पिन्सी
जिन्जी।”

थे य्हाल य्हाल्बा मलमलला सफा क्वान चा

* 19:2 वयव ३२:४३; २ राजा ९:७ * 19:3 यशै ३४:१० * 19:5 भजन ११५:१३

* 19:6 इज १:२४; भजन ९३:१; ९७:१; ९९:१

परमेश्वरला म्हिगदेसे लबा ज्यबा गे हिन्ना।

9 ओच्छे थे स्वर्गदूतसे डादा “एसे चु ताम भ्रिउ, थाबा पिन्बा ग्यु बोगोला ब्याहला भोजरी निम्तो याड्बा म्हिगदे चा परमेश्वरग्याम मोलम याड्बा म्हिगदे हिन्ना” भिसी भिजी। थेसे दोःसी डादा “परमेश्वरला सत्य बचनगदे चुनोन हिन्ना” भिसी भिजी।*

10 जमाहेनसे थेला काडरी फ्या लबाला लागिरी डा ख्लुप तजी। तर थेसे डादा चुहडु भिसी भिजी, “एसे डादा फ्या लबारी आत। डा चा एदेन एला हांगदेदेन छ्याम ओच्छे येशूला सत्य बचन ड्यान्बा म्हिगदे जम्मानदेन छ्याम परमेश्वरला गे लबा म्हि जे हिन्ना। थेतबासेलमा परमेश्वरदा जे फ्या लउ। तिगदा भिसम अगमवक्तासे पाड्बाएनोन येशूला बारेरी पाड्बा सत्य बचन हिन्ना।

तार ताथोरी क्रेःसी निबा

11 डाड स्वर्ग ठोड्बा म्राड्जी, च्यागो, थेरी तार ता गिक मुबा। थे ताथोरी क्रेःसी निबा म्हिला मिन चा विश्वास लखम्बादेन सत्य मुबा। थेसे लबा निसाफदेन लडाइ ठीक मुला।* 12 थेला मी मेला ल्हाम हड्बान मुबा, ओच्छे थेला थोबोरी ल्हानान मुकुट कूबा मुबा। थेला डोरी मिन गिक भ्रिबा मुबा, थे मिन थेदा बाहेक स्य्हान्दो खालैदान था आरेबा।* 13 थेसे कारी ब्लुम्बा क्वान क्वान्बा मुबा। थेला मिन “परमेश्वरला बचन” मुबा। 14 स्वर्गला सेनागदे मलमलला तार सफा क्वान क्वान्सी तार तागदेशोरी क्रेःसी थेला लिच्छा लिच्छा भ्रिजी। 15 थेला सुडग्याम छ्याबा तरवार थोन्जी, ओच्छे थेसे थे तरवार थोसी यहुल यहुलला म्हिगदेशोरी ढाला। थेसे फाइला कडी थोसी थेनीगदेशोरी शासन लला। ओच्छे कोलरी अडगुर नाड्सी म्हर्बा हड् लसी थेसे जम्मान भन्दा घेन परमेश्वरला घेन बोमोसे नाड्सी थेनीगदेदा

* 19:9 मत्ती २२:२-३ * 19:11 इज १:१; भजन ९६:१३; यशै ११:४ * 19:12 दानि १०:६

म्हर्ला।* 16 थेसे क्वान्बा क्वानदेन काडःसूहुरी “ग्लेगदेला ग्लेदेन प्रभुगदेला प्रभु” भिसी भिबा मुबा।

17 जमाहेनसे डाइ धिनीरी राप्सी चिबा स्वर्गदूत गिक म्राङ्जी। थेसे मुरी फ्याङ्बान लबा जम्मान चरागदेदा घेन काइरी चुहङ् भिसी भिजी, “परमेश्वरसे ठीक लबा घेन भोज चबारी पोप तउ। 18 ग्लेगदेदेन कप्तानगदे ओच्छे शक्तिशाली म्हिगदे, तागदेदेन ताथोरी क्रेःबागदे, ओच्छे नोकर हिनसै आहिनसै, जजा, घेन जम्मालान स्या चबारी खउ।”*

19 जमाहेनसे डाइ थे समुन्द्रग्याम थोन्बा लोङ्बा खबा जन्तुदेन जम्बुलिडला ग्लेगदे हाड हाडला सिपाही थोसी तार ताथोरी क्रेःबादेन थेला सिपाहीगदेदेन छ्याम लडाइ लबाला लागिरी पोप तबा म्राङ्जी। 20 तर थे समुन्द्रग्याम थोन्बा लोङ्बा खबा जन्तुदेन थे जन्तुला डाच्छापट्टि उदेकला गे लबा फट्टा अगमवक्तादा चुङ्जी। उदेकला गे लसी थे फट्टा अगमवक्तासे थे जन्तुला छापदेन थेला मूर्तिदा पूजा लबा म्हिगदेदा फसब लबा मुबा। थे न्हीदा छोन्बोन गन्धकला लुङ्बा मेला ग्योइरी भ्याङ्जी।* 21 ओच्छे थे न्हीला जम्मान सिपाहीगदेदा चा ताथोरी क्रेःबाला सुङ्ग्याम थोन्बा तरवारसे साइजी। ओच्छे चरागदेसे थेनीगदेला स्या जम्मान भेन्ना चजी।

20

हजार गिक दिड

1 जमाहेनसे डाइ ल्हानान नुपबा व्हाडला साँचोदेन घेन च्याल्दा गिक यारी थोसी स्वर्गग्याम मार फापबान लबा स्वर्गदूत गिकदा म्राङ्जी। 2 थेसे अजिङ्गरदा चुङ्सी च्याल्दासे हजार गिक दिडधोनाला लागिरी खीसी थान्जी। थे अजिङ्गर चा दडबोला

* 19:15 भजन २:९; यशै ६३:३; योए ३:१३; उन्बा १४:२० * 19:18 इज ३९:१७-२०

* 19:20 उन्बा १३:१-१८

पुखी म्हड म्हडला ग्ले शैतान हिन्ना।* 3 थे अजिङ्गरसे दाहेन्से यहल यहलला म्हिगदेदा फसब थालगै भिसी हजार गिक दिडधोनाला लागिरी स्वर्गदूतसे थेदा ल्हानान नुप्बा व्हाडरी भ्याङ्सी थे व्हाडला म्नापरी ताल्चा लसी लाहा छाप लजी। ओच्छे हजार गिक दिड छ्योमाहेन्से थेदा ला न्ही सोमला लागिरी पुइतोःला।

4 जमाहेन्से डाइ ठिगदेदेन ठिथोरी धन्छ्याबागदे म्नाङ्जी। थेनीगदेला निसाफ लबा अधिकार पिन्बा मुबा। ओच्छे डाइ येशूला सत्य तामदेन परमेश्वरला बचन थेःना लबासे लमा थोबो थासी साइबागदेला आत्मागदे म्नाङ्जी। थेनीगदेसे थे समुन्द्रग्याम थोन्बा लोङ्बा खबा जन्तुदेन थेला मूर्तिदा आतेन्बा मुबा ओच्छे डोदेन यारी थेला छापएनोन लबा आरेबा। थे आत्मागदे दोःसी सोजी ओच्छे हजार गिक दिडधोना ख्रीष्टदेन छ्याम शासन लजी।* 5 चुहङ् लसी सिबाग्याम दोःसी सोबा चा चु डाच्छा रेम हिन्ना। अर्गु सिबागदे चा थे हजार गिक दिड आछ्योतेथोना आसोनी। 6 डाच्छारेम सिबाग्याम सोबागदे चा परमेश्वरग्याम मोलम याङ्बागदेदेन हाडला लागिरी फेसी थान्बा म्हिगदे हिन्ना। थेनीगदेदा दोःसी कालला शक्तिसे तिगै लआखम। तर थेनीगदे परमेश्वरदेन ख्रीष्टला पूजा लबा म्हि दोला ओच्छे ख्रीष्टदेन छ्याम हजार गिक दिडधोना शासन लला।

सदनना लागिरी शैतान नाश तबा

7 हजार गिक दिड छ्योमाहेन्से शैतानदा च्युप्सी थान्बा ग्लाग्याम पुइला। 8 जमाहेन्से शैतान जम्बुलिड नाडलान गोग ओच्छे मागोग भिबा यहल यहलला म्हिगदेदा फसब लबारी निला। शैतानसे लडाइ लबाला लागिरी थे यहलला म्हिगदेदा ग्ला गिकरी पोप लला। थेसे पोप लबा म्हिगदे समुन्द्रला बालुवा

* 20:2 उत्प ३:१ * 20:4 दानि ७:९, २२

तेनोन तला।* 9 थेला सेनागदेसे जम्बुलिड नाडलान परमेश्वरला म्हिगदेला पालगदेदेन परमेश्वरसे माया लबा शहरदा घेरब लजी। तर स्वर्गग्याम मे ताइसी थेला सेना नाश तजी। 10 य्हुल य्हुलला म्हिगदेदा फसब लबा थे शैतानदा चा गन्धकला लुड्बा मेला घ्योइरी भ्याड्जी। थेरी डाच्छान थे लोड्बा खबा जन्तुदेन लुसीला ताम पाड्बा अगमवक्तादा भ्याड्बा मुबा। थेरी थेनीगदेसे धिन म्हुन सदन सजाय नातो:ला।

जम्बुलिडला म्हिगदेला निसाफ

11 जमाहेन्से डाइ घेन तार ठि गिकदेन थे ठिथोरी धन्छ्याबादा म्राड्जी। ठिथोरी धन्छ्याबाला डाच्छाग्याम मुदेन जम्बुलिड यार्जी ओच्छे दो:सी खानडएनोन आप्राड्नी।* 12 डाइ घेन जजा जम्मान सिबागदे थे ठिला डाच्छापट्टि राप्सी चिबा म्राड्जी। थेरी किताबगदे ठोड्सी थान्बा मुबा, ओच्छे अर्गु किताब गिकएनोन ठोड्जी। थे किताबला मिन चा जुकजुकधोनाला जुनी हिन्ना। थे जम्मान किताबगदेरी थेनीगदेसे लबा गेला बारेरी भ्रिबा मुबा, थे गेगदे अन्छारनोन सिबागदेला निसाफ लजी। 13 समुन्द्रसे हाडदेन छ्याम मुबा सिबागदे दो:सी पिन्जी, कालदेन सिबा म्हिगदेला आत्मा चिबा ग्लासेनोन हाडदेन छ्याम मुबा सिबागदे दो:सी पिन्जी। ओच्छे थेनीगदे जम्मालान हाड हाडसे लबा गे अन्छार निसाफ लजी। 14 जमाहेन्से कालदेन सिबा म्हिगदेला आत्मा चिबा ग्लादा मेला घ्योइरी भ्याड्जी। चु मेला घ्योइरी भ्याड्बा चा दो:सी सिबा हिन्ना।* 15 जुन म्हिला मिन जुकजुकधोनाला जुनीला किताबरी आस्याप्नी थेदा मेला घ्योइरी भ्याड्ला।

21

परमेश्वरसे जम्मान सहे छार सहोबा

* 20:8 इज ७:२; ३८:२, ९, १५ * 20:11 दानि ७:९-१० * 20:14 उन्बा १:१८

1 जमाहेन्से डाइ छार मुदेन छार जम्बुलिङ म्राङ्जी। तिग्दा भिसम डाच्छाला मुदेन जम्बुलिङ म्हासी निबा मुबा, ओच्छे समुन्द्रएनोन आरेबा मुबा।* 2 ओच्छे डाइ परमेश्वरला शहर, छार यरूशलेम परमेश्वरग्याम स्वर्गहेन्से मार खबान लबा म्राङ्जी। थे यरूशलेम म्हाछारला लागिरी ज्योसी थान्बा चाडछार हड्बान मुबा।* 3 डाइ ठिग्याम चुहड् भिबा घेन काइ गिक थे:जी, “च्यागो, परमेश्वर म्हिगदेदेन छ्याम धन्छ्याबा मुला। परमेश्वर थेनीगदेदेन छ्याम धन्छ्याला ओच्छे थेनीगदे थेला म्हि तला। थेहड् लसीन थे हाडनोन थेनीगदेला परमेश्वर दो:सी थेनीगदेदेन छ्याम धन्छ्याला।* 4 थेसे थेनीगदेला जम्मान मीख्ली फ्यासी पिन्ना। ओच्छे थेनीगदे दो:सी खाइमै आसि, खालैदान सुर्दा आत, खालैनोन आक्रा, ओच्छे खालैदान तिगै दुखएनोन आत। तिग्दा भिसम डाच्छाला तामगदे चा जम्मान म्हासी जिन्बा मुला।*

5 ठिरी धन्छ्याबासे डादा “च्यागो, डाइ जम्मान ताम छार सहोला” भिसी सुङ्जी। थेसे दो:सीनोन डादा “चु ताम भ्रिउ, तिग्दा भिसम चु तामगदे चा विश्वास लखम्बादेन सत्य मुला” भिसी सुङ्जी।

6 परमेश्वरसे डादा चुहड् भिसी सुङ्जी, “दाहेन्से जम्मान ताम पूरा तसी जिन्जी। अल्फादेन ओमेगा* डानोन हिन्ना, ओच्छे शुरु लबादेन जिन्ना लबाएनोन डानोन हिन्ना। क्युइ फुइबागदेदा डाइ जुकजुकधोनाला जुनी पिन्बा क्युइला मुलग्याम ओहड्नोन थुड्बारी पिन्ना।* 7 जुन जुनसे ढाला थेसे डाग्याम चु जम्मान हक याङ्ला। डा थेला परमेश्वर दोला ओच्छे थे डाला झा दोला।* 8 तर लोड्बागदे, विश्वास आलबागदे, नइबा गे लबागदे, म्हि

* 21:1 यशै ६५:१७; ६६:२२; २ पत्रु ३:१३ * 21:2 यशै ५२:१; ६१:१०; उन्बा ३:१२

* 21:3 इज ३७:२७; लेवी २६:११-१२ * 21:4 यशै २५:८; ३५:१०; ६५:१९ * 21:6

उन्बा १:८ * 21:6 यशै ५५:१ * 21:7 २ शमू ७:१४; भजन ८९:२६-२७

साइबागदे, स्युहान्दोदेन छ्याम ब्रेल्सी भ्रबागदे, टुनामुना लबागदे, मूर्तिदा तेन्बागदेदेन जम्मान लुसीला ताम पाड्बागदे चा गन्धकदेन लुड्बा मेला घ्योइरी नितोःला। चु मेला घ्योइरी निबा चा दोःसी सिबा हिन्ना।

छार यरूशलेम

9 जमाहेन्से थे जम्मान भन्दा लिच्छाला आपत विपतसे प्लिड्बा खोरे निस थोबा गोर निस स्वर्गदूतगदे न्हडला गिक खसी डादा “खउ, डाइ एदा चाड्छार उन्ना, थे थार्बा पिन्बा ग्यु बोगोला मिड हिन्ना” भिसी भिजी। 10 जमाहेन्से डा परमेश्वरला आत्मासे प्लिड्जी। ओच्छे थे स्वर्गदूतसे डादा नोबा गडरी भोर्सी परमेश्वरग्याम स्वर्गहेन्से मार फापबान लबा परमेश्वरला शहर यरूशलेम उन्जी।* 11 थे शहर परमेश्वरला घेन य्हालदेन शक्तिसे प्लिड्बा मुबा। ओच्छे थे शहर चा ल्हानान बिल्लौरदेन रत्नगदे ओच्छे स्फटिक हड्बान झक्झक्बा मुबा। 12 थे शहरला क्युर्नोन च्युक न्ही म्राप थान्सी सहोबा घेन घेन नोबा पर्खाल मुबा। थे म्रापदडसेन गोर गिक गिक स्वर्गदूत मुबा। थे म्रापदडसेन इस्राएलला च्युक न्ही वंशला मिन भिबा मुबा।* 13 स्यारपट्टि म्राप सोम, झ्याडपट्टि म्राप सोम ल्होपट्टि म्राप सोम, न्हुपपट्टि म्राप सोम मुबा। 14 थे शहरला पर्खालला जगरी ग्ला ग्लारी च्युक न्ही घेन घेन युडबा थान्बा मुबा। थे युडबादडसेन थार्बा पिन्बा ग्यु बोगोला च्युक न्ही मुल चेलागदे गिक गिकला मिन भिबा मुबा।

15 थे शहरदेन शहरला म्रापगदे ओच्छे पर्खाल दप्बाला लागिरी डादेन छ्याम ताम पाड्बा स्वर्गदूतदेन छ्याम म्हरला दप्बा सहे गिक मुबा।* 16 थे शहर चारपाटे मुबा। थे शहरला लम्बाइदेन चौडाइ च्योच्यो मुबा। थेसे थे दप्बा सहेसे शहर दप्मा हजार न्हीसे

* 21:10 इज ४०:२ * 21:12 इज ४८:३०-३५ * 21:15 इज ४०:३

ग्यार्जा ब्ली किलोमिटर मुबा। थे शहरला लम्बाइ, चौडाइदेन नोबा च्योच्यो मुबा।¹⁷ स्वर्गदूतसे पर्खालएनोन दपूजी। म्हिगदेसे चलब लबा दपूबा स्हे अन्छार थे पर्खाल बोगल सोमसे मिटर डा ब्लाक्बा मुबा। चु दपूबा स्हे स्वर्गदूतलाएनोन हिन्ना।¹⁸ थे पर्खाल बिल्लौरग्याम स्होबा मुबा। ओच्छे शहर चा ज्यबा म्हरग्याम स्होबा मुबा। थे शहर सफा सिसा हड्बान य्हाल य्हाल्बा मुबा।¹⁹ थे पर्खालला जगरी युबा थे घेन घेन युडबारी ल्हानान थरीला म्हंगो रत्नगदे थान्बा मुबा। पर्खालला जगरी थान्बा थे घेन घेन युडबारी रत्न गिक गिक थान्बा मुबा। जम्मान भन्दा डाच्छा थान्बा युडबारी चा बिल्लौर, जमाहेन्से अर्गु युडबारी नीर, हरित रत्न, पन्ना,²⁰ थेहड् लसीन आनिक्स, लालमणि, पीतमणि, बेरूज, पुष्पराज, लसुने, नीलमणि, ओच्छे जम्मान भन्दा लिच्छाला युडबारी चा कटेला थान्बा मुबा।[†] ²¹ थे शहरला च्युक न्ही म्राप चा च्युक न्ही मोतीग्याम स्होबा मुबा। जम्मान म्रापगदे चा मोती गिक गिकग्याम स्होबा मुबा। थे शहरला ग्याम सफा सिसा हड्बान ज्यबा म्हरग्याम स्होबा मुबा।

²² डाइ थे शहर न्हडरी मन्दिर गिकनोन आम्राड्नी। तिग्दा भिसम थे शहरला मन्दिर चा जम्मान भन्दा घेन परमेश्वरदेन थार्बा पिन्बा ग्यु बोगो हाडनोन हिन्ना।²³ थे शहरदा य्हाल तना लबाला लागिरी धिनीदेन लनी आतोः। तिग्दा भिसम परमेश्वरला य्हालदेन शक्तिसेन थे शहरदा य्हाल तना लमुला। थे शहरला नाडसल चा थार्बा पिन्बा ग्यु बोगो हाडनोन हिन्ना।* ²⁴ परमेश्वरला य्हालरीन य्हुल य्हुलला म्हिगदे भ्रला। ओच्छे जम्बुलिड नाडलान ग्लेगदेसे हाड हाडला धन सम्पत्तिदेन मान थे शहररी भला।* ²⁵ थे शहरला

† 21:20 २१:१९-२० चु पदरी ल्हानान रत्नगदेला मिन मुला। चु पदरी पाड्बारी म्हाइबा चा अर्गुन अर्गुन छोनना य्हालदेन ल्हानान य्हाल य्हाल्बा ओच्छे झक्झक्बा मुला भिसी पाड्बा हिन्ना। * 21:23 यशै ६०:१९-२० * 21:24 यशै ६०:३

म्रापगदे धिनीरी खाइमै आढुङ्, तिग्दा भिसम थेरी म्हनु तनोन आत।
 26 यहुल यहुलला म्हिगदेसे हाड हाडसे याड्बा मानदेन ल्हानान
 धन सम्पत्ति थे शहररी भला।* 27 तर नइबा तामगदे, आज्यबा पेःबा
 खबा गे लबागदेदेन लुसीला ताम पाड्बागदे तिगै लसीन थे शहररी
 वाड्आम्याड्। थार्बा पिन्बा ग्यु बोगोला जुकजुकधोनाला जुनीला
 किताबरी मिन मुबा म्हिगदे जे थे शहररी वाड्म्याड्ला।*

22

जुकजुकधोनाला जुनी पिन्बा स्योड

1 जमाहेन्से थे स्वर्गदतसे डादा स्फटिक† हड्बान झकझकबा
 जुकजुकधोनाला जुनी पिन्बा क्युइला स्योड उन्जी। थे स्योड
 परमेश्वरदेन थार्बा पिन्बा ग्यु बोगोला ठिग्याम थोन्जी।*
 2 ओच्छे थे स्योड थे शहरला ग्यामला गुडग्याम तबान निबा मुबा।
 थे स्योडला कुनी न्हीरीन जुकजुकधोनाला जुनी पिन्बा दोड मुबा।
 थे दोडरी लाएनोनदडसे थरी थरीला रो रोमुबा। थेरी दिड गिकरी
 च्युक न्ही थरीला रो रोमुबा। थे दोडला भा चा यहुल यहुलला
 म्हिगदेदा खम्ना लबा मन मुबा।* 3 दाहेन्से थे शहररी मुबा खजिबै
 सहेदा परमेश्वरसे आकेः।†

परमेश्वरदेन थार्बा पिन्बा ग्यु बोगोला ठि थे शहररीन तला,
 ओच्छे थेला म्हिगदेसे थेदा तेन्ना।* 4 थेनीगदेसे परमेश्वरला
 स्युहाल म्राड्ला, ओच्छे थेनीगदेला डोरी थेला मिन भिबा तला।
 5 थे शहररी दोःसी खाइमै म्हनु आत। थेनीगदेदा नाडसलदेन
 धिनीला यहुल आतोः। तिग्दा भिसम परमप्रभु परमेश्वरनोन

* 21:26 यशै ६०:११ * 21:27 यशै ५२:१; इज ४४:९ † 22:1 “स्फटिक” भिबा
 चा सिसा हड्बान झकझकबा सफा सहे हिन्ना। * 22:1 इज ४७:१; जक १४:८

* 22:2 उत्प २:९; इज ४७:१२ † 22:3 चु पदरी “आकेः” भिबा चा सराप आयु भिबा
 हिन्ना। * 22:3 जक १४:११

थेनीगदेला य्हाल दोला। ओच्छे थेनीगदेसे थेरी सदन शासन लला।*

6 स्वर्गदूतसे डादा चुहड् भिसी भिजी, “चु बचन विश्वास लखम्बादेन सत्य मुला। अगमवक्तागदेदा हाडला आत्मा पिन्बा परमप्रभु परमेश्वरसे हाडला गे लबा म्हिगदेदा योनान तबा तामगदे उन्बाला लागिरी स्वर्गदूत पुइखबा मुला।”

येशू योनान फेपखबान मुला

7 येशूसे चुहड् भिसी सुड्जी, “च्यागो, डा योनान खबान मुला! चु किताबरी भिबा अगमवाणीला बचन अन्छार भ्रभागदे परमेश्वरग्याम मोलम याड्बागदे हिन्ना।”

8 चु जम्मान ताम थे:बादेन म्राड्बा डा यूहन्ना हिन्ना। डाइ चु जम्मान ताम थे:बादेन म्राड्माहेन्से डादा चु ताम उन्बा स्वर्गदूतदा फ्या लबारी डा कू तजी। 9 तर थेसे डादा चुहड् भिसी भिजी, “च्यागो, एसे चुहड् लबारी आत। डा मी एदेन एला ज्योज्यो आले अगमवक्तागदे ओच्छे चु किताबरी भिबा ताम इयान्बागदे हड्बा परमेश्वरला गे लबा हो जे हिन्ना। परमेश्वरदा जे फ्या लसी तेन्गो।”

10 जमाहेन्से थे स्वर्गदूतसे डादा चुहड् भिसी भिजी, “चु किताबरी भिबा अगमवाणीला बचन आपाड्ना कुटिसी थाचिउ। तिग्दा भिसम चु जम्मान तामगदे तबारी छ्याइबा मुला। 11 नइबा गे लबा म्हिसे नइबान गे लसी चिगै, पे:बा खबा गे लबा म्हिसे पे:बा खबान गे लसी चिगै, ज्यबा गे लबा म्हिसे ज्यबा गे लसीन चिगै, ओच्छे तिगै दोष आरेबा म्हिसे तिगै दोष आरेबा गे लसीन चिगै।”*

12 येशूसे चुहड् भिसी सुड्जी, “च्यागो, डा योनान खबान मुला! डा इनामदेन सजाय भसी खला। जमाहेन्से डाइ जम्मान म्हिगदेदा

* 22:5 यशै ६०:१९; दानि ७:१८ * 22:11 दानि १२:१०

थेनीगदेसे लबा गे अन्छार इनामदेन सजाय पिन्ना।* 13 अल्फादेन ओमेगा, डाच्छादेन लिच्छा ओच्छे शुरु लबादेन जिन्ना लबा डानोन हिन्ना।*

14 “जुकजुकधोनाला जुनी पिन्बा दोडला रो चबा हक याड्बारीदेन शहरला म्प्रापगदेग्याम न्हडरी वाड्म्याड्गै भिसी हाड हाडला क्वान खुबागदेा चा परमेश्वरग्याम मोलम याड्बागदे हिन्ना।* 15 तर नगी हड्बा म्हिगदे, टुनामुना लबागदे, स्य्हान्दोदेन छ्याम ब्रेल्सी भ्रबागदे, म्हि साड्बागदे, मूर्तिदा तेन्बागदे, लुसीला ताम सेम निबागदेदेन लुसीला ताम अन्छार भ्रबागदे चा शहरला मडग्यार तला।

16 “डा येशूसे मण्डलीगदेरी मुबा जम्मादान चु तामगदे था तना लबाला लागिरी एनीगदे मुबा ग्लारी डाला दूत पुइखबा मुला। दाऊद ग्लेला मुल सन्तान डानोन हिन्ना। ओच्छे स्य्होला झक्झक्बा सारएनोन डानोन हिन्ना।”†*

17 परमेश्वरला आत्मादेन चाड्छारसे “फेप्खउ” भिसी भिला। जुन म्हिसे थे ताम थे:ला थेसेनोन “फेप्खउ” भिसी भिगै। जुन म्हिदा क्युइ फुइला थे खसी जुकजुकधोनाला जुनी पिन्बा क्युइ ओहड्न्नोन थुड्गै।*

18 च्यागो, चु किताबरी भ्रिबा अगमवाणीला बचन थे:बा म्हिगदेदा डाइ पाड्ला।

चुदे खालै म्हिसे चु किताबरी भ्रिबा तामरी अर्गु ताम काप्जी भिसम चु किताबरी भ्रिबा जम्मान आपत विपतगदे परमेश्वरसे

* 22:12 यशै ४०:१०; ६२:११; भजन २८:४; यर्मि १७:१० * 22:13 उन्बा १:८, १७; २:८; यशै ४४:६ † 22:14 “हाड हाडला क्वान खुबागदे” भिबा चा येशूदा विश्वास लसी येशूला काग्याम पापला दोष मेटब तबा म्हिगदे हिन्ना। * 22:14 उत्प २:९; ३:२२ † 22:16 “स्य्होला झक्झक्बा सारएनोन डानोन हिन्ना” भिबा चा थार्बा पिन्बा ख्रीष्टसे हाडलान छार धुइ शुरु लला भिबा हिन्ना। * 22:16 यशै ११:१, १० * 22:17 यशै ५५:१

थेदा काप्सी पिन्ना। 19 ओच्छे खालै म्हिसे चु अगमवाणीला किताबरी भ्रिबा बचनग्याम तिगै ताम ते:जी भिसम चु किताबरी भ्रिबा जुकजुकधोनाला जुनी पिन्बा दोडदेन परमेश्वरला शहरग्याम थेसे याड्तो:बा हक परमेश्वरसे थेग्याम ब्यन्ना।*

20 चु जम्मान तामगदे उन्बादेन सुड्बासे चुहड् भिसी सुड्बा मुला, “हिन्ना, डा योनान खबान मुला।”

आमेन, फेप्खउ, प्रभु येशू।

21 परमेश्वरला जम्मान म्हिगदेदेन छ्याम प्रभु येशूला दयामाया तगै। आमेन।

* 22:19 व्वव ४:२; १२:३२

परमेश्वरला बचन छार कबुल New Testament in Tamang, Eastern

Copyright © 2011 Eastern Tamang Language Team

Language: Eastern Tamang (Tamang, Eastern)

Translation by: Wycliffe Bible Translators

Contributor: Wycliffe Bible Translators, Inc.

Copyright Information

© 2011, Wycliffe Bible Translators, Inc. and Eastern Tamang Language Team.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789937221221

The New Testament

in Tamang, Eastern

© 2011, Wycliffe Bible Translators, Inc. and Eastern Tamang Language Team.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

Updates

eBible.org

PDF generated using Haiola and XeLaTeX on 3 Jul 2018 from source files dated 14 Jun 2018

75fec6d5-7473-5018-a7c0-dd9740a83748